

*ASO GAFUA, 29 IUNI 2020*

*Na nofoia e le Fofoga Fetalai le Nofoa i le itula e 9:13 i le taeao.*

Tatalo.

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoaofa Faitulafono.

Ou te faatalofa atu i le paia o le amataga o Galuega o lenei vaiaso, aua le feagai ai ma tiute o le Palemene.

**TULAFONO TAU FAAOFI O LE FAATATAUINA O TUPE  
FAAOPOPO (NU.3) 2019/2020 & TULAFONO TAU FAAOFI O LE  
FAATATAUINA O TUPE 2020/2021  
– felafolafoaiga faaaauu i luga o le faitauga faalua**

**FOFOGA FETALAI:** E tolopo Galuega a le Fono Aoaofa i le aso Fono ua tuanai i le la vaiaso i le aso Faraile, o lo o saunoa le Afioga i le Minisita mo Galuega, Felauaiga ma Atinae Eeseese. Ma lou faaaloalo ou te tapa lau Afioga i le Minisita mo Galuega e tulai mai e faaaauu le saunoaga i mea sa laga e sui usufono mamalu o le Palemene.

**Susuga Hon PAPALIITELE NIKO LEE HANG (Minisita mo Galuega, Felauaiga ma Atinae Eeseese):** Faafetai atu i lau Afioga i le Fofoga Fetalai mo le avanoa, e faatalofa atu foi i lau Afioga aemaise foi le paia ma le mamalu o le Palemene i lenei taeao fou.

Lau Afioga ae le i faamaeaina atu lau lauga, ou te fia piama atu foi i le viiga o le tatou Matai Sili ma faafetaia ai pea Lona alofa ma Lona agalelei ua tatou aulia mai ma le manuia lenei taeao fou i lo outou soifua laulelei ma so matou ola.

Lau Afioga i le Fofoga Fetalai, e malolo i le aso Faraile le tatou Fonotaga, ua oo mai lau tali atu i mataupu sa laga mai e le sui usufono mamalu lea mo Safotulafai po o Faasaleleaga Nu.2, sa talosaga mo se fesoasoani mai le Kamupani Vaa (SSC) mo femalagaaiga a le mamalu o le atunuu pe mafai ona malaga fua i latou i le aso o le palota tele ia Aperila 2021. Lau Afioga, taatia maia lau talosaga se i aulia le tausaga fou ona tagai i ai lea o le kamupani pe maua se 50% discount ona o le talosaga, pei o le mataupu lea

e faia e le Kapeneta le faaiuga e malaga fua ai le mamalu o le atunuu i le aso o le palota. Ia se i aulia le tausaga fou ona toe silasila lea o le Pulega pe talafeauga lea talosaga. Ma le faaaloalo lava.

Lau Afioga i le Fofoga Fetalai, mo le silafia e lau Afioga faapea le mamalu o sui usufono, o se update lenei o galuega tetele a le Malo o lo o faatino i le taimi nei, aemaise o le faafogafoga mai a le mamalu o le atunuu. O le galuega lea i Moamoa i le alasima kolosi i le alasima, ua amatalia le galuega o lo o faatino nei, faamoemoe e maea ia Oketopa 2020. O le tatou auala lea i le west coast road, le auala lea e agai atu i le malae vaalele, o lo o faaauau pea le asphalt lea ua i Afega i Malua ua 60% le tulaga ua maea ai, o lo o faatino e le OTT Contractors. A o le vaega lea i Puipaa i Faleula, o lo o faatinoina le galuega lea e le Joint Venture mo le faamoemoe e maea foi ia Aokuso 2020. O le faaauauina o le tatou galuega lea o le malae vaalele o le west coast package tool, mai Malua i Faleolo faamoemoe e amata ia Ianuari 2021. O le tatou galuega lea e fai i i Vaisigano i le ala kolosi sima lea e faatino e le JICA, ua maea ona fausia le ala kolosi i le 75 mita le umi ae 1.5 mita le maualuga. Ua 92% nei le tulaga ua maea ai lea tapenaga, a o lo o faagasolo nei le faaleiina o le auala ma le faamoemoe e maea ia Aokuso 2020.

O le vaa mo Puleono i Salafai, o lo o talia nei e le Kamupani Vaa (SSC) se lipoti mai le Kamupani a le Lloyds i se fautuaga i se vaa talafeagai mo i tatou aemaise ai le tulaga o le saogalemu i luga o le vasa ma tuuina atu loa lea o se fautuaga mo se finagalo autasi o le Kapeneta. Ua faatuatuai le tapenaga ona o le aafiaga i le faamai o le Koviti-19. O le vaa e sui ai le Lady Naomi ua maea ona faailoa mai e le Malo o Iapani o le latou meaalofa lea mo tatou, o lea ua tapena ai nei e le SSC le design o le Lady Naomi II ona fau ai lea o le vaa, ma le faamoemoe e taunuu mai i fanua ia Tesema 2022 pe a maea ona siaki ma pasia uma tulaga o le vaa.

O auala sima kolosi po o fords mo Lano ma Sapapalii i Puleono i Salafai, faapea foi auala sima kolosi i Faatoia ma Tiavea, o lea ua tapena mo le fausiaina pe a pasia le Tala Faatatau Autu o le Tupe 2020/2021.

O le auala mai Vaiaata i Patamea o le galuega lea ua amata, ma e faamoemoe e maea i le faaiuga o le tausaga nei 2020.

O le suavai taumafa mama mo Lotofaga, Aleisa Sasae, Lepale, Faleasiu-uta ma Fasitoo-uta, e faamoemoe e tatalaina ia poloketi i le vaiaso fou aso 2 o Iulai 2020.

Lau Afioga i le Fofoga Fetalai ua maea ai ona ou tali atu i mataupu uma ia sa laga mai i saunaoga a sui usufono mamalu. Ae lau Afioga ma le paia o le Palemene, ou te manatu e tatau pea ona ou faasilasila atu se update mo tatou alo ma fanau o lo o galulue i luga o vaa laupasese (crew ships) ma vaa lauolua (cargo ships) i atunuu i fafo aua lava le faafogafoga tapuai mai a matua ma aiga aemaise le faafogafoga tapuai mai o le paia ma le mamalu o le atunuu.

O le taimi nei lau Afioga i le Fofoga Fetalai, e 322 le aofai o seila Samoa o lo o faigaluega faa-konekarate i luga o vaa a le Kamupani MSC po o le Mediterranean Shipping Company i Italia. E 250 seila Samoa sa faigaluega i luga o vaa laupasese ae peitai, e 57 i latou ua maea latou konekarate ma o lo o nonofo fua pea i luga o vaa ma tausii lelei e le kamupani vaa MSC se i toe tatala malae vaalele faava o Malo ona toe foi mai lea o i latou. E 201 i latou o lo o faigaluega pea se i maea foi latou konekarate ona tapena mai foi lea o latou. E fia faamauina la le agaga faafetai e fai ai lou leo faatauvaa ma sui o le Malo e faafetai ai le kamupani vaa MSC mo le latou galuega lelei ma le alofa aua le tausiga o alo ma fanau ia ua maea latou konekarate. E 64 le aofai o seila Samoa o lo o galulue i luga o vaa lauolooa, o lo o maua uma o latou totogi, ma le vaega atoa lea e 265, tuufaatasi ai seila ia e faigaluega i luga o vaa meli ma vaa lauolooa.

O se lipoti lata mai mai le Kamupani Vaa MSC, o lo o manuia uma tatou alo ma fanau ma e leai foi se isi o pesia i le faamai. O lo o faaauau pea fesootaiga a le tatou Kamupani (SSS) ma le MSC mo updates i le soifua manuia o tatou alo ma fanau. E toatasi se seila Samoa sa aafia i se faalavelave sa tulai mai i luga o se vaa laupasese, ma na molia ai i le faaoolima ma le faamanua. O lo o taofia lea seila i lalo o le Tulafono i Miami Florida e faatali le toe tatalaina o malaga a vaalele ona toe faafoi mai lea o ia. O le tala fiafia, o lo o soifua manuia uma i latou ma ua maua foi avanoa e fai ai latou siaki faafomai i luga o vaa ae leai se totogi. Ua tele faamatalaga sese aemaise ai o tuuaiga i luga o upega tafailagi ma nusipepa ma faasalalau ai e le o fesoasoani le Malo i se auala e toe faafoi vave mai ai alo ma fanau ia ua maea latou konekarate. E sese ia tuuaiga. O le naunautaiga lea o le Malo, ia vave ona toe faafoi mai alo ma fanau ia ua maea latou konekarate. O le faamoemoega o le tatou Malo, o le taimi lava e toe tatala ai femalagaiga a vaalele, ona tapena loa lea o le toe faafoi maiga o i latou.

Lau Afioga i le Fofoga Fetalai, ou te fia faaaogaina foi lou avanoa faaauoro ou te faapai atu ai i si ou itumalo pele o le Nofoa Tu Taulaga i Sasae.

**Afioga Tafua Maluelue Tafua (Aleipata Itupa i Lalo):** Lau Afioga i le Fofoga Fetalai...

**FOFOGA FETALAI:** Se i malie le sui usufono mo le Nuu Tu Taulaga i Sasae se i tulai mai lava le sui usufono mo Aleipata Itupa i Lalo, saunoa lau Afioga i le Matua.

**Afioga Tafua Maluelue Tafua:** Faafetai lau Afioga i le Fofoga Fetalai. Faafetai o lea foi ua sii le viiga ma le faafetai i le Atua i leni taeao e faapea foi i le tapuaiga a le atunuu. Faafetai tele i lau Afioga i le Minisita lau susuga Papaliitele. E tasi lava si tamai mea sa ou tulai atu ai. E momoli atu le agaga faafetai o lea ua maua o le a faatino le auala lea i Tiavea lea e i ai le ford lea

e i ai fai lava si faaletonu. Ae o le agaga o lou tulai atu ma le agaga faaaloalo, e iai lava le alagaupu faapapalagi foi lea, “what’s good for the goose is good for the gander.’ Ou te le iloa po o le a le faa-Samoa sao o lena mea, ioe. O le mea lelei mo le pato fafine e lelei foi mo le pato poa, tulou. A o lea ou te faalogo atu, o le a totogi pasese o fua i le vaa i Savaii e ave ai le au palota. E i ai foi le matou uafu i Satitua. O lea la ou te talosaga atu ai ma le agaga faaaloalo, pe talafeagai foi ona avatu matou tagata i Apia i le uafu i Apia e ave agai i le uafu i Satitua aua e kava ai Lotofaga, o Lepa, ia ma le matou foi itumalo i Aleipata ma le faaaloalo lava.

**FOFOGA FETALAI:** Ia, se i tulai mai le sui usufono mo Faasaleleaga Nu.2.

**Tofa Namulauulu Sami Leota (Faasaleleaga Nu.2):** Lau Afioga i le Fofoga Fetalai, faafetai mo le avanoa ua maea ona e sii le viiga ma le faafetai i le Atua i leni taeao. E faafeiloai atu foi i lau Afioga i le Taitai o le Maota ma le mamalu o le Palemene. E tulai atu na ona faaleo le faafetai i lau Afioga i le Minisita o Vaa i femalagaaiga, o lea ua maua atu ua agai lau faatalatalanoaga aemaise foi o le tulaga i le talia o se talosaga sa tuuina atu e leni sui usufono. E foliga mai foi i lau talanoa o lea o le a faavagavaga se 50%. O lea foi e matau atu o lo o talanoa mai le Minisita o Tupe atonu o le a vaai i ai, atonu o i ina e maua mai ai se isi 50%.

Lau Afioga i le Fofoga Fetalai, e ala ona ou talanoa atu i le vaega leni, ona o le itumalo leni lea na amata ona faatataitai i ai le tatou Tulafono lea ia faapena ona agai uma tagata palota i Savaii. I le faaiuga o le matou faiga palota e 1,000 tagata e le i palota. O nisi o vaega lea e le...

**FOFOGA FETALAI:** Malie le sui usufono faapuupu mai le saunoaga, e le toe saunoa, ae na o se mea e fia faamalamalama po o se mea fia faasao faamolemole.

**Tofa Namulauulu Sami Leota:** O nisi o vaega o le au maliliu, o nisi o le au malaga i fafo, a o le toatele e le i malaga i Savaii ona o le tulaga lea. Ia manatua foi a e alu i Savaii, e ese lou pasese, ese lau meaai, ese ma le tupe e faaagaaga e faatau ai se vaemoa i le aiga lea e te alu i ai. O le isi la taimi a faapea e te le palota, e \$100 e alu e faasala ai oe. Ae faafetai o lea ua maua atu i le fesoasoani a lau Afioga i le Minisita, ia e momoli atu le agaga faafetai, e foliga mai o lea o le a talia le talosaga a leni itumalo faafetai.

**FOFOGA FETALAI:** Faafetai. Ia, ua malamalama lelei mataupu sa outou tulai mai sa aafia i a outou saunoaga, aua a tatou toe o i le itu lea, ua toe lagalaga foi ma tulai mai sui usufono uma e faaali ma faamanatu mai,

ona o le faafofoga mai lava a tatou itumalo. Ae malie o lea ua saunoa le Minisita faalauaitetele i le tulaga o mataupu uma ia sa outou laga.

Ia, se i tuu atu lava i le Aiga i le Tai, e faamalie atu lau Afioga i le Minisita, i faapea mai le atunuu ma Aiga i le Tai ai ua le maua se avanoa, a o le tulaga lena. E le toe tau sasalua la ni lauga, na o le tu lava i luga faasao mai. Take the... i le mea o le aano tonu o le...

**Susuga Mulipola Leiataua Laki (Aiga i le Tai):** E moni lau Afioga i le Fofoga Fetalai, ae na o se vaega e fia faamalamalama. Ia, o tatou e talanoa lava i le mea foi lele mo avanoa tutusa. Ia o le avanoa mo Savaii e faapena foi se avanoa mo si ou motu o Manono. O lea ua maua ua ave le faamama avega mo Savaii i se taimi o i luma, e faapena foi se agaga o le sui usufono o lenei itumalo, o se faiga mo lou motu i Manono, aua foi le fegasoloai i le taimi o le palota. Ma le agaga faaaloalo. Faafetai.

**FOFOGA FETALAI:** Faafetai. Ia, se i tulai mai le Afioga i le Minisita. Ae ona o lea ua e tea ese ma le vai ma mea tau auala, a o faafofoga mai foi lou itumalo, faafetai atu on behalf of Fasitoo-uta i le vai ma le auala. Malo faafetai, e le laitiiti lau faasoa, e tau ma se toa ma oe, a o lenei lava e taumafai e faatofutofusia, malo. Tulai mai lau Afioga i le Minisita. Faafetai lava, faamanuia le Atua ia te oe.

Ia leaga o lea ua tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia):** Lau Afioga i le Fofoga Fetalai, o le tapenapenaga mamao e taua mo le tatou faiga palota. Lea ua tali atu le Minisita faamoemoe mo Savaii. O le taimi lava lenei e aumai uma ai talosaga e lelei e tapenapena mamao i ai, ia pe i ai foi nisi afioaga e manaomia pasese i pasi, o le taimi lava lenei e aumai ai aua le tuua, po o le fia pasese i taxi, aumai loa aua le taofia. Aua o le mea lea na muamua mai ai Salafai, e le o se mea fou. O le mea moni lava, o i tonu lava na tuai ai ona faatino le fuafuaga lea, lea ou te masalo pe 3 a tatou Komiti Suesue sa agai i ai i le mataupu lea i le sailiga o tagata moni o le itumalo e faapitoa la mo Savaii, e sili ia le aua ne i toe faia nei mea o palota faapitoa, ona o le tulaga lea ua tele naunau tatou sui faatutu mai Savaii, e uma le faasalalauga i le po muamua, a o lea e faatali atu iinei, e 200+ e malo ai, fai loa le pati, a o lea e le i alu atu le faitauga lea o palota faapitoa, ae alu atu, e 400 i le 500 e malo ai i. Ua tele lava la ina tulai mai le faasea, e tataua ona taofia ia mea leaga o lea e sao ai le tulaga foi lea o tagata e le tau i le itumalo, a o lea ua aumai solo e sui faatutu.

O le mea la lea na ala ai ona toa le faatinoga o le tulaga lena i le sailiga o le amiotonu ona o mea lava ia tau tagata e o i Savaii, a o lea la ua aumai le manatu e tataua ona treat tutusa o tatou tagata, ia ou te le te i foi la i lou

faalogo atu o manaomia foi se fesoasoani mo Manono. A o le taimi lava lenei, a manaomia foi pasi, e totogi pasi e o ai ni tagata e o atu iinei e o i Moataa, ia o le taimi lava lenei e aumai ai.

**FOFOGA FETALAI:** Malo. Ia se i tulai mai lau Afioga i le Minisita o Galuega.

**Afioga Aliimalemanu Alofa Tuuau (Alatau Sisifo):** Lau Afioga i le Fofoga Fetalai...

**Susuga Hon PAPALIITELE NIKO LEE HANG:** Faafetai i lau Afioga i le Taitai mo le faaopoopoina foi o le tali atu...

**FOFOGA FETALAI:** Ia, faamolemole, se i malie lava lau Afioga i le Minisita mo Galuega se i tulai mai le sui usufono mo Alataua Sisifo. Saunoa lau Afioga.

**Afioga Aliimalemanu Alofa Tuuau:** Lau Afioga i le Fofoga Fetalai ona o lea ua tatala mai le avanoa mo ni talosaga, ia e muamua atu la le avanoa a le Alataua Sisifo mo se pasi se i ave ai lo matou itumalo mai Salelologa agai i tua o i le Itu Asau. Faafetai.

**Tofa Hon Faasootauloa Pati Taulapapa (Gagaemauga Nu.2):** Lau Afioga i le Fofoga Fetalai...

**Susuga Hon PAPALIITELE NIKO LEE HANG:** Lau Afioga i le Fofoga Fetalai, ou te manatu ua maea uma faauilavea, o le a galo le lauga talu ai le tele o faauilavea.

**FOFOGA FETALAI:** Malie sui usufono. E pei o le isi... Tou te le o maua le uiga o le saunoaga a le Palemia o le aua le aumaia mea valea i totonu o le Palemene. O le uiga tonu lena. Ia a avatu la pasi i Savaii ae faapea Upolu ia?

**Tofa Hon Faasootauloa Pati Taulapapa:** Faafetai tele lava i lau Afioga i le Fofoga Fetalai, faafetai foi i lau Afioga i le Palemia o lea ua tatala mai le avanoa. Ona pau lava lenei o le itumalo e seasea tu i luga, e seasea laga se manatu, ae na pau foi lenei o le itumalo, o le pule a le Atua lea na fai ai fuafuaga.

Mo lou silafia lau Afioga i le Fofoga Fetalai, e le o se pule a le Malo na aumai ai le matou nuu i Salamumu, o le pule a le Atua. O lea foi la ou te talosaga atu ai, e tataua ona fai se fua a le Malo mo lo matou nuu, e tau lava o Salamumu e o atu i Savaii leaga e le o le pule a le Atua e le o se pule a le Malo. Ma lou faaaloalo, o lau talosaga lea ma lou faaaloalo.

**FOFOGA FETALAI:** Ia, taoto mai, manaia foi le finagalo o Saleaula ia. Tulai maia lau Afioga i le Minisita e saunoa i mea sa laga e sui usufono mamalu.

**Susuga Hon PAPALIITELE NIKO LEE HANG:** Lau Afioga i le Fofoga Fetalai, ou te fia tali atu muamua i le Afioga ia Tafua, i le faa-Peretania lea na saunoa mai ai, what's good for the goose is also good for the gander. A faa-Samoa le tulaga lea i lau Afioga, o le mea lelei mo le matuamoa, e lelei foi mo le toa. O le upu masani foi lele, o mea lelei i Apia, e lelei foi i afioaga i tua, ma Salafai. E pei o le faauigaina lena o lau faapapalagi lea na e saunoa mai ai. Ua manino?

**Afioga Tafua Maluelue Tafua:** Lau Afioga i le Fofoga Fetalai, o se mea e fia faasao lau Afioga. O le mea muamua, e le o se moa le mea o le gander lea na ou talanoa atu ai. O le mea e tau o le goose ma le gander. O le mea foi lele ua umi ou te le iloa le faa-Samoa o le kusi lea e umi lava le ua tulou, a o le gander o le mea poa foi lele. Ma le faaaloalo. Faafetai i lau Afioga mo le fesoasoani mai.

**Susuga Hon PAPALIITELE NIKO LEE HANG:** Ia o lena lava e te silafia ae toe fesili mai foi. Ia a le malamalama, o le kusi ma le gander, ia po o le... o le kusi o le poa ae o le gander o le fafine. O tulaga faapena.

Ona o lea ou te matau atu pei ua faaseseina lau talanoa atu i pasese o le vaa, e le i faia se faaiuga, a o lea ou te tau faalogologo atu i a outou afioga o lea ua fai le faaiuga. E le i faia se faaiuga. O lau lava fesoasoani atu, se i tuu i le kamupani vaa pe talia se 50% o le discount, a o le 100%, ia o le matafaioi lena a le Kapeneta. E le i taitai la oo ia Aperila e fai ai se tulaga o le mea lea, ae pei ua tutulai mai faapela ma ave le faamanuiaga i Salafai. E leai, e le i faia se faaiuga. O lea la ua maua atu ai foi ua uma ona saunoa ai le Palemia, ia aumai ma pasi, aumai ma taxi. Ia, o le taimi lenei, a o le faalavelave tou te le i lauga lava i lenei mea, na o le sui usufono lava o Safotulafai sa lauga ai, a o lea e pei ua lagalaga foi ni finagalo fou ona o lea ua talanoa le mataupu, ae o lea sa manino i lau folasaga, e le i faia se faaiuga. Ae taatia mai se i fono le paa ma ona vae.

Ia le paia o le Nofoa Tu Taulaga i Sasae, o lea o le a toe oo atu i ai lau lauga i si ou itumalo pele, le paia i Aiga ma le nofo a Maopu, le mamalu i leTausivaatele a Tuisamau ma le nofo a ituaiga ia Fuata, e le mafai ona ou laaloa i Fao ae faagalo outou i Malaka, e pei o le upu i le vaa o Fagalao. Le paia o le au palota mai si ou itumalo pele Tu Taulaga i Sasae, o e sa siilima ma aumai lo latou tauau e lagolagoina ai la outou auauna i lenei Paeaiga ua toe o se aga mou atu. Ua outou faia lava le mea sili ma outou manumalo ai. O lau tatalo leleoa i le mea pogisa, sagai ane ai o le tai i la outou tapuaiga,

ia manuteleina la outou tofa ma le faautaga aua le isi faalagamaea o lo o loma mai. Aumai manu o le Atua e faauma ai galuega faaii o lenei tausaga. Faafetai tele mo la outou tapuaiga faapea talosaga siitia ua mafai ona faigofie le faatinoina o tiute ma galuega sa feagai ma la outou sui usufono. Faafetai tele mo la outou faaeaea aemaise lo outou faatuatuaina ma lo outou talitonuina o lou nei tagata faatauva e fai ma outou sui usufono i le Palemene o Samoa mo tausaga e tele. A maea loa le Paeaiga lenei i le 2021, ona atoa ai lea o le 20 tausaga talu ona ou tauaveina le tofi sui usufono o si o tatou itumalo.

E malie lava le talafaasolopito o le tatou itumalo, ua faalua nei ona fai suiga tetele a le Ofisa o Faiga Palota sa aafia ai tatou. Mo le silafia o le Paeaiga a le Palemene 2001-2006 lea sa ou tulai mai ai i le taimi muamua, o avea lenei itumalo ma Itumalo o Palota Taitoatasi. Sau i le isi Paeaiga i le 2006-2011 o tumau pea i le Palota Taitoatasi. O le suiga muamua na tulai mai i le Paeaiga 2011-2016, ma e tatau foi ona tauva se sui usufono mamalu i se suafa matai. Ona sui mai lea i le Palota Taitoatasi i le Itumalo Tu Taulaga i Sasae o lo o i ai i le taimi nei. O le 2016-2021 o lo o faapena lava ona ou tauaveina le Nofoa o le tatou Itumalo Tu Taulaga i Sasae.

O le suiga lona 2 la lea e faapea e faamamalu i le palota fou 2021-2026 lea o le a avea ai le tatou Itumalo ma Itumalo o Vaimauga Nu.3.

Ou te fia faaaogaina foi lenei avanoa e momoli atu ai vaimalu i puega pe afai ua sala se gagana, ua le tautamalii ma atoatoa se tautua i sa outou faafogafoga mai, ma sa outou silasila mai. O le upu moni lau Afioga i le Fofoga Fetalai faapea le paia o le Palemene, e le atoatoa se tagata, ae peitai, ou te talitonu lava o le a magalo le auauna faatauva i sa outou tofa faatupu, tofa faatamalii aemaise o se tofa faakerisiano e faavae i le loto alofa ma le loto faamagalo. O upu masani o le gataifale, “e leai lava se tautai e atoa ni i’a i sona vaa.” Afai ua sala uta, ia tonu tai. Ia faagalo ma faamagalo se le atoatoa o la outou auauna, ae faamoemoe lava i le agaga o le Atua e atoa ai manu i le tatou taeao fesilasilafai. Tatou feiloai i le masina o Oketopa 2020 pe a tatala le faauluina o sui tauva mo le faiga palota ia Aperila 2021, e faamatala atu ai nisi suiga o le tatou itumalo fou o le Vaimauga Sisifo Nu.3. Ia manatua asiasi i le Ofisa o le Resitala mo le faiga palota ma siaki a outou resitala mo le faiga palota i le 2021. Aua ne i galo e molia oe i le Tulafono, e faasala oe pe a e le resitala ma palota, faataua lau palota.

Lau Afioga i le Fofoga Fetalai, ona faatai ai lea o so matou leo, ia faamanuia mai le Atua i lou soifua maua, ia faaatoatoa lou malosi i le agaga, le tino ma le mafaufau, aua lou valaauina e faafoefoe a tatou fonotaga. Faamalo foi i lau Afioga le faapalepale ma lou onosai. Faamanuia foi le Atua i lau Afioga i le Palemia, le Sui Palemia ma sui usufono uma o le Palemene faapea le maave eseese i a outou Afioga i Ofisa Sili o Pulega o Matagaluega ma Faalapotopotoga Tumaoti a le Malo.



Lau Afioga i le Fofoga Fetalai, faafetai mo lou avanoa. Soifua and God bless.

**FOFOGA FETALAI:** Malo faafetai. E le tau selu atu i le saunoaga a lau Afioga i le Minisita o Galuega, o lo o faapena ona faafofoga tapuai mai Samoa.

Ia ma o le avanoa lenei ou te tapa lau Afioga i le Minisita mo Tagata Tafafao Maimoa Mai, lau Afioga Sala, tulai mai e te saunoa i mea sa laga e le Maota. Ia manuia le saunoaga.

**Afioga Hon SALA FATA PINATI (Minisita mo Tagata Tafafao Maimoa Mai Fafu):** Lau Afioga i le Fofoga Fetalai, i le ava tele ma le migao ou te tulai ai e faaleo se manatu e tusa ai ma le tofi ua tofia i ai lou nei tagata.

Lau Afioga ou te manatu ua lalago faatasi paia o Samoa i le Maota i leni taeao, o Samoa foi o Samoa ua uma ona tofi. Ou te talitonu o paia sauoo o le Maota o Samoa, o lea ua aofia potopoto i le taeao manino leni ma le taeao totoa i le agaga faafetai i le Atua.

Ou te manatu, o le a tuutuuloa se taumafaiga a lou nei sui usufono vaivai, e popoe foi le taofi ona o le taimi ua le lava le taimi, ae ua oo mai le taimi e tatau ai ona pasia le Tala o le tupe, ae paga lea o lo o tele pea galuega. O le ala lea ou te faapai atu ai i le paia o le Maota, le faafofogaaga a Samoa i ona tulaga faalupe. Malo le faatautaia o leni aso fono Samoa, faafetai.

Lau Afioga i le Fofoga Fetalai, ou te faafetai atu i lau Afioga, aua ua malu le Maota ona o le taitaiga a lau Afioga. Ou te fia avatu foi le agaga e faatalofa atu ai i le Afioga i le Palemia, le Sui Palemia, le Kapeneta, Minisita Lagolago, ae a le Maota fono a Samoa ua tatou faatasi i leni taeao. Le aufaigaluega a le Malo, malo le tautua, e le tau fai atu se tala, o la outou lea tofi o le tatou galulue faatasi. O le Maota leni e tua i ai le atunuu leni, e tua i ai Samoa. O mea lelei uma, ia faatino i lo tatou taimi, aisea? Ona ua uma ona fai a tatou tautoga, tautoga lea i luma o le Atua Silisili Ese, e pulea mea lelei e pulea mea tetele, e pulea foi mea iti. Samoa e mamala Samoa. Ona ou faapea lea, aumaia le avanoa lau Afioga o le a taumafai atu.

O le a muamua ona ou paia Tagata Tafafao mai Fafu, lau Afioga i le Fofoga Fetalai, ua le toe po se lilo i le tulaga pagatia ua i ai nei le atunuu, aemaise foi le lalolagi atoa i le faamai po o se luitau foi, se mala? ou te le o iloa po o se mala. Aua e fai o le popoto ma le matautia o nuu mamao tetele i mea tau, ma le luitau ma le le talitonu i le Atua, a lea. O le tali lea. Ou te talitonu o le tali lea mai le Atua, ia ifoifo lava le tagata ia. Fai mai le tatalo a le matou ekalesia, o e maualuluga ia faapea ona faapau ifo i lalo a ia faaeaea e maualalo i o latou nofoalii. O le tala e tusa ai ma le faamai o le misela ma le Koviti-19. Ua aafia le tamaoaiga o Samoa, ua le toe tau fai atu se faamatalaga e tusa ai ma le mea ua oo i ai tatou. Talofa, e i ai se i totonu o

le atunuu lenei a o le aufaipisinisi, o lo o i ai ni talitonuga o lo o saogalemu ma lelei a latou pisinisi? O le tali, e leai. O le anoanoai o le mau tusi ia e aumai e agai mai i le aufaipisinisi fai faletalimalo. O le a se vaifofo e aumai mo i matou ne? ua faateleai le matou tulaga i aitalafu tupe, ua tele tagata ua vaea. O le aofai o faamaumauga lea e i, ua faitau-afe le aofai o tagata ua leai ni galuega.

E ao lava ona ou avatuina ia tulaga e pei ona i ai faamaumauga ua oo mai. E muamua o faamanuiaga i mea tau tupe e ala mai lea i tagata tafafao. O le tausaga 2014-2015, o le aofaiga o e na malaga mai e 133,000, o le aofaiga o le tupe maua, e \$347 miliona. O le 2015-2016, o le aofai o e malaga mai, 146,104, o le aofai o le tupe maua, e \$385 miliona. O le 2016-2017, o le aofai o tagata tafafao mai e 146,437, o le aofai o le tupe maua \$387 miliona. O le 2017-2018 e 163,323 na o mai. O le aofai o le tupe maua e \$454 miliona. O le 2018-2019 e 178,564 le aofai, o le tupe na maua, e \$514 miliona. I le 2019 agai mai ia Mati i le 2020, o i ina lea na aafia ai loa Samoa i le misela. Lea e sosoo ai nei ma le faamai lea o le Koviti-19. O le aofai o i latou na matauina na oo mai i le taimi lea seia paia Mati, e 124,399 le aofai, o le pau o le tupe, mai le \$514 e \$375 miliona. E tele le pau, ua tele le afaina. E fai o tupe maua a le atunuu, ae ua afaina foi aiga, e sa faamoemoe i a latou galuega e maua mai i faletalimalo, pasi, i faleoloa, i taxies, beach fales, ona o pisinisi laiti e faatau ai lavalava ma mea uma ia tau turisi, ua tele le afaina.

O le a le mea ua tulai mai? Ae o le a se vaifofo? A o ai foi le pota a o le malosi o ai e fai ai? E faapefea ona aapa Samoa i le leai o se mea e mafai ona faatino ai lona tamaoaiga? Faafetai, faafetai i le Atua, faafetai i le Agaga o le Atua ua aumai ai i le taitai, taitai alofa, e le faigofie le galuega, o lo o gapatia ai e o lo o faasoasoa. Silasila foi, e tele manaoga, tele faafitauli. O se avega e ave e ai? O se mea ea tau ia Tuilaepa ma le Kapeneta? O se Malo e tau o Tuilaepa, ma le sui Palemia ma le Kapeneta? Samoa e leai, o le galuega na tofia i ai tatou. O oe ma au, o oe na e nofo mai luga i ina, o oe o lo o faafogafoga mai tua, tatou galulue. Aua ne i o tatou tusitusilima, i manatu ifo lava le tagata o fea e te sau ai? O au o le afakasi, o au ou te pitolua ou te toto Saina, o au e i ai lou toto meauli. E le taua pe a e alu i fafo. O le fesili e fesili mai ai le Immigration i Niu Sila, fea e te sau ai? Ou te sau mai Samoa, e le fesiligia oe faapea mai o oe o se afakasi po o ai. O oe o le Samoa moni, e te tu ma faapea ifo ia oe, a ou faia se mea lelei mo lou Malo ma ou tagata, o le tatou sao lena. Le Fofoga Fetalai, ou te faanoanoa, e i ai lava le taofi lea e i ai, tatou o e saili mai po o le a se mea mai le Malo mo i tatou. Ou te manatua le tala a le tamaloa lea, lea e faapea, aua e te manatu ifo e saili e le Malo se mea mo oe. Ae fesili ifo oe po o le a se mea e te faia. O le a le mea e te faia? O le a se mea e mafai ona tatou faia e faalelei ai le economy o le atunuu. Nofonofa i le fale, tau o le talitali o mea e tuu atu, aua se mea i le atunuu lenei. O lea foi o le a oo i le faigapalota, mea e avatu. A le avatua le tupe e le sau, a le avatua le tupe e sau ai e fai le ID e le sau. A e

le avatua i ai le \$30, \$50 \$100, e le palota ia oe. Fea le moni? O fea le moni? O fea le tofa ma le faautautaga? O fea le faamaoni o le alofa? E le o se alofa lea. E le mafai na e faataua se tagata i se tupe, se i tulou. O le tamaliiaga o le tagata, o lo o soifua le Atua, o le a avatu tupe e faamalie ai, se tulou lava Samoa ma lau faafofogaaga, leaga o le mai lea ua tatau ona aveese. O tatou uma lava lea e i totonu o le Maota. E leai se isi e magalo mai ai, o le fai foi o le naunau i le ufi, ae fefe lava i le papa lea. O le itu lea, o le tamaoaiga lena, e mafai ona tatou savalia auala faigata, pe a tasi le loto tasi lo tatou agaga e faatino ai mea uma. O le tamaoaiga o Samoa, aisea le mea o le a tatou fesili ai ma faapea ifo. O le a se mea ua fai? A lena e i ai auala, a lea la o la ou tolaulau atua mea na fai, taumafai ai aua le vaivaiga o na o tatou tagata, se i tulou. E momoli atu foi le agaga o le faafetai, faafetai i e o lo o feagai pea ma e tafafao mai fafo, i le galuega e le faigofie. O le totoa, i le tamaoaiga e faaalu, aisea? E alu le tupe e toe sue mai le tupe, o a nei le taimi lenei? O lea ua alu atu le tupe, ma alu atu ai lava i le vaitafe se i tulou. Ae leai se tupe e maua mai, leaga o lea ua gau. O mea la ia o lo o tuufesili mai ai le tele o le au-faifaleletalimalo. E a le matou eletise? O fea e fai i ai le pili o matou vai? O lena le itu e popoe i ai, aua o le mea nei e le pulea e au, e le pulea foi e le Malo. Ua i ai lava policies ua uma ona faataatia ua faatulafonoina, e mulimulitai i ai. e leai foi se isi i luga ole Tulafono, o tatou uma lava e i lalo o le Tulafono. Ia tatou mulimulitai i le Tulafono ona tatou taunuu lea i le tulaga e pei ona manaomia ai le faigamalo lau tautua, o oe ma au.

O mea la nei ua faatino e le pulega o tagata tafafao, o maketi, ua faaauau pea galuega faalauiloa a tatou maketi autu i Niu Sila, Ausetalia ma Amerika Samoa. E ala i polokalame i luga i le social media e pei o facebook ma isi. Ua toe faaleleia atoa ai a tatou upega faatekonolosi, e pei o le website, laupapa faalauiloa i autafa o magaala i luga o main street i Ausetalia ma Niu Sila. Ua agai foi le tatou Pulega e uunaia ma faalauiloa le local market o tagatanuu i totonu o le tatou lava atunuu. Ua faagasolo le polokalame e pei o le pusa fuamoa ua aotauina ai, pe a ma le toaselau i latou o aooga nei i le Matata Eeseese i Ausetalia. O le Talanoa Lakapi i le ala ea, malaga faapitoa i Savaii ma Upolu mo le autusitala ma isi ina ia faalauiloa, ma fesoasoani i ai ia i latou nei mo le latou silafia ma faalauiloa atu ai, mea o lo o tutupu i totonu lava o Samoa ia. O mea uma la nei, e totogi uma e le Ofisa o Tagata Tafafao le autusitala ma i latou e malaga atu i fafo. O lo o nonofo foi i faletalimalo e totogi foi e le Ofisa, ina ia faalauiloa atu. Se o le atunuu lenei o se atunuu matagofie, e tele mataaga lelei, mataaga e tatau ona oo i ai le toatele o le au turisi, ae paga lea, e le o i ai le pitolaau lea, e pei ona ou avatuina. O le tatou galulue, aumai la outou pitolaau avatu le pitolaau a le Malo, e faalauiloa ai nofoaga ia i tuamaota ma tualaoa o lo o i ai mataaga matagofie ae le o silafia. O le a la le mea e fai ai?. E tatau ona oo mai i le Ofisa, tatou talatalanoa, o le a se mea e mafai ona fesoasoani atu. Ua tele le

mau tagata e o mai e tafafao, o le lalolagi atoa e matagofie latou mataaga, matafaga mama.

**Tofa Olo Fiti Afoa Vaai (Salega Sasae):** Lau Afioga i le Fofoga Fetalai.

**FOFOGA FETALAI:** Se i tulai mai le sui usufono mo Salega.

**Tofa Olo Fiti Afoa Vaai:** Faafetai i lau Afioga mo le avanoa. E aoga foi lou tulai atu se i tau koma le Minisita. Ae ua logo faa-tutuila ma taliga fialogo foi i le saunoaga matagofie i le tulaga o lo o i ai le tatou atinae o Turisi. E maua atu lava, ma ou te fiafia i lau saunoaga faapea, o le alu o le tupe e sue mai le isi tupe, manaia. Ae na o le faafesili atu lava i lau Afioga, O le a se plan a le tatou Matagaluega i le taimi lenei? E vaai i beach fales ma hotels. O lea ua tagi mai ia le Industry lea i se fesoasoani a lau Afioga ma le Matagaluega. Po o le a se tatou plan i le taimi lenei, aua e le iloa, tatou te le iloa po o le a le umi o le Koviti-19 lea e i ai. A o nai tagata faigaluega foi, e moni ai lau saunoaga, o le a o e malolo, aua o le a e faamalolo ona o le leai o se tupe maua i le taimi lenei, ae po o le a sau plan?

**FOFOGA FETALAI:** Tulai mai le Minisita.

**Afioga Hon SALA FATA PINATI:** Faafetai atu i le uso a sui usufono. O le matafaioi tonu lava lea e saunoa i ai le sui usufono, e leai ia i tatou nei e nonofo i Samoa. E le o tupu i papalagi le mea lea e tupu i Samoa. O nuu ia i afioaga eseese o tatou, a oo loa i mea tau faamatai, e tataua lava ona e i ai i mea la e i ai pulega i faiga o upu ma mea e faatino. Ma ave foi la lau fesoasoani i mea, pe a faapea mai, o saofaga i mea ia, o le galuega o mea ia. E mataitu foi, se o i e iloa ai Taitai. E iloa ai le au matauu le vaega foi lea e matau pe uumau mea. A tau loa le taimi palota, faatoa o mai loa lea fai mai, tatala atu mea ia, ou te avatu mea uma na, aisea? Aua o lea ua oo i le taimi o palota. Ua aliali ai le fia manao o le isi tagata e faaalua ni mea i le taimi lea, ae a le 5 tausaga lea e fai ai le tautua masani. O tautua faifaipea, e le o se taitai ea ia e tataua ona mataitu? e le o le mea lea o lea e faapea mai ai le sui usufono, o le a se mea e fai e le Matagaluega lea ia te oe lea e ana le beach fale lea ua faaletonu? O le pisinisi, e te le tuua faatasia le fuamoia i le ato e tasi. Ua tataua ona outou iloa le mea lena. E le mafai ona tuufaatasia mea i le ato e tasi. O le mea la lea, a oo i le taimi e taei ai, e i ai se isi mea o e faia e te support ai oe ma lou aiga? pe na o le beach fale lava. Aua e pei ona ou fai atu, e te fesili ifo po o le a se mea o e faia. O lau tautua tuavae i lou nuu i lou aiga ma lou Malo, e le tau avatuina e le Malo ia mea e faaola ai oe. E te soifua mai i le olaga lenei, e alu lou tina ma lou tama e saili mai mea mo i tatou. E te le i ola mai o i ai ni mea. Fai le palota a lou tama se i tulou lava, feoi mai le fanau telenonoa se i tulou, leai se tupe e faatau ai ni lavalava.

**Tofa Olo Fiti Afoa Vaai:** Lau Afioga i le Fofoga Fetalai,

**FOFOGA FETALAI:** O lea e le i uma atu le faamalamalama.

**Tofa Olo Fiti Afoa Vaai:** O lea ua manaia o lea ua kilia ma manino le saunoaga a le Minisita, o lea foi ua faafofoga mai le atunuu. Faafofoga mai foi le au fai hotel ma beach fale. E le avatuina e le Malo ia outou ni mea e atiae ai outou. A o fea le mau tupe lea e avatu i le budget? E tai fia sefulu miliona lea e avatu e atinae ai e le Malo ia atinae ia o hotels ma beach fale. E pei o le mea lea ua ou tau te i atu foi i lea mea. E fai lava mea a le tagata latou ia, a ua leai lava se mea ua leai se mea. Ae o le tiute lea o lau Afioga i le Minisita ma le Matagaluega, o le atinae o mea ia.

**FOFOGA FETALAI:** Malie le sui usufono e le i oo atu i ai le saunoaga a le Minisita.

**Tofa Olo Fiti Afoa Vaai:** Ona o le baby lea a le Malo lea e tau fagafaga. O lea e tau fagaga le baby lea a le Malo o le Turisi. A o lea e vaai atu nei, ua tiai foi e le Minisita lea mea.

**FOFOGA FETALAI:** Malie le sui usufono, e le i oo i ai le saunoaga a le Minisita.

**Afioga Hon SALA FATA PINATI:** E, maumau e o upu lelei pe ana avatu e faaofi gofie i le tagata e le faaoga lona mafaufau. O le mea moni lava. E oso foi le ita i le fai atu lava ae tulai mai, tulai mai. E le faia e le Malo le mea lena, o le avatu o tupe i tagata.

**Tofa Olo Fiti Afoa Vaai:** O lea ou te vaai atu nei, e faaoga o matou mafaufau ae ua tau leai mai sou mafaufau i i i lau saunoaga lea e fai.

**FOFOGA FETALAI:** Malie le sui usufono mo Salega.

**Tofa Olo Fiti Afoa Vaai:** O lea e faafofoga mai, o le atinae o lea e te fitoitonu i ai, o lau responsibility lena.

**Afioga Hon SALA FATA PINATI:** Lau Afioga, o lo o solifono le uso lea

**FOFOGA FETALAI:** Malie le sui usufono

**Tofa Olo Fiti Afoa Vaai:** E leai sau plan o faia o le matuai maimau ai lava ma le taimi.

**FOFOGA FETALAI:** Se i alala mai i lalo ona o lena e te solifono, e pei ona saunoa mai ai le Minisita. O lena e manino lava le saunoaga a le Minisita, aua ne i tuua faatasi i le ato e tasi ne i taei faatasi. O le fautuaga, o la ua aumai le matupalapala. Se i saunoa mai.

**Afioga Hon SALA FATA PINATI:** E pei e manaia ia o le saunoaga a lou uso ia Olo. Olo, se o le mea lea e ala ai ona viia oe, e taulagalaga i mea ia. Ua iloa so o se pisinisi lava, a leai le faitio e le tupu le pisinisi, o le mea moni lava. A e nofonofo ma e manatu ifo lava oe ua lelei mea ua e faia, talofa, e i ai le taimi e gotouga ai i lalo le mea lea e te nofo ai, ae e te leo mataua lelei po o le a le mea lea e tupu. A lea, faafetai Olo, e lelei mea lena e te faia, e ui lava ina tiga ia te au, ae faafetai. Se o le mea lea e lelei ai Olo, o i inei e le selua a tatou upu, e le uua faauu a tatou...

**Tofa Olo Fiti Afoa Vaai:** Lau Afioga i le Fofoga Fetalai, ou te faamalulu atu i lau Afioga i le Minisita, alo i ou faiva, o lena ua manaia lava le fagogo lena ua e...

**FOFOGA FETALAI:** Malo, tulai mai le Minisita.

**Afioga Hon SALA FATA PINATI:** O le mea lea i le soifuaga o Samoa, po o le a le tetele o pesega, ae o lea lava e matua lava i i, i le mea o lo o i ai le Maota fono o Samoa. Ia faafetai i si ou uso. Ona e sese le faapea mai o Olo ua tia, ou te le i tiaia vaeatu le paia ma le mamalu o Samoa o lo o faafogafoga. O lo o sau pea ia tua, ia foai ma le fesoasoani Olo, e faatino uma ai mea ia. Ae pei ona avatu se lagona, o le tatou sao i le atinae, o le tatou taumafaiga faatasi. Ua i ai lava maketi i fafo, ua uma ona faatalanoaina ma o tatou sui ia i fafo. Ma e momoli atu ai le agaga o le faafetai i le Ofisa Sili o Pulega le Afioga ia Salaga Faamatuainu Tuifua ma le aufaigaluega. E ese le manaia o lo outou sao lena e fai. E pau lava le mea, aua le tafafao umi, a o foi i tua e fai galuega, fai lelei, vaai le vaega na e faamaumau taimi e i ai. A faaletonu loa, faamalolo ae o mai isi. Ona ou oo mai ai lea i le Uesetete e pei ona ou taua,

**FOFOGA FETALAI:** Malie le Minisita, se i tulai mai le sui usufono mo Faleata.

**Tofa Lealailepule Rimoni Aiafi (Faleata Sisifo):** O lea sa mamafa lau faamatalaga, sau tuualalo i le mataupu lea i Turisi, lau Afioga. O lea ua maea ona faitau, e pau lea o le Matagaluega ua maea lelei ona tapena ia le latou

lipoti i aafiaga o le latou Sector i le faamai. Faafetai i lau Afioga i le Minisita. Lelei le tapenaga, e pau foi lea o le Sector o lea tatou te iloa lea e pitosili ona aafia. O lea ua saunoa manino le Minisita, mai le \$514 miliona i le tausaga na tea nei, mo le taimi nei ua lata i le \$380 miliona le tupe pau lea ua i ai. O lona uiga, o finagalo uma ma manatu e tataua ona ave le faamuamua i le vaega lea i lenei taimi. O le saunoaga a le Minisita e pei sa tau alu le mafaufau e pei o le saunoaga a Olo, faapea foi lea i le toe tuu i tua o tagata. Ae o lea e manino i le lipoti, mai le \$375 miliona lea ua pau, e \$105 miliona lea e manaomia, e fesoasoani ai i le vaega lea, ona o le taimi lenei ua ova ma le 2000 ia tagata e leai ni galuega. O lea la e saunoa le Minisita i faalauiloa i fafo, ou te talitonu lau Afioga faafetai i lea vaega. Ae o le taimi lenei, e le o manaomia tele aua tatou te le iloa po o le a le umi e loka ma tapuni ai le border. Ae o lea sa avatu le fautuaga i lau Afioga, se tuualalo i le tatou Emergency le tatou Komiti lea e i ai ma le Kapeneta, mo itula tatala. E fesoasoani i le tou galuega i lenei taimi aemaise o galuega a nai tagata, po o le a le faiga e fai ai. Afai e \$105 miliona lea e manaomia. Ua tataua ona ave i ai le faamuamua a le Malo, ma le faaaloalo lava.

**FOFOGA FETALAI:** Malie lau Afioga i le Minisita, se i tuu atu i le sui usufono mo Palauli le Falefa.

**Afioga Hon Faumuina Tiatia Faaolatane Liuga (Palauli le Falefa):** Faafetai, leaga o lea o le a see ese. Faafetai Sala mo le folasaga maea. Leaga o lea o le a e see ese i se tasi o mataupu taua. Sa ou laga le tulaga foi lea i mataaga, o le mea la lea, pe le o le taimi lenei e amata ai ona atinae loa ia mataaga. Ia toe tatala atu le sa, ae ua i ai mataaga e o mai turisi, e pei o le Papaolefaatolotologatama, o le Maasogi, ma le mea sa i ai ia Taemanutavae ma Faugagana. E pei o mea ia e fia matamata ai ia turisi ma umi ai le taimi e nonofo ai i Samoa. Ma lou faaaloalo lava.

**FOFOGA FETALAI:** Malie le sui usufono mo Palauli Sisifo se i tulai mai le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o se mea lava e fia fesoasoani atu i saunoaga ia e fai nei, o lea ua matua manino le saunoaga a le Minisita, e i ai foi le sao e fai o le pisinisi ia, e le faapea o le a faalagolago uma mai i le tatou Malo. E aafia uma ai lava pisinisi. O lea sa tolaulau manino atu le tele o le stimulus package lea na avatu, pei ua talanoa foi lele pei o se mea e le o aafia i totonu o le Tala o le Tupe. Lau Afioga i le Fofoga Fetalai, o auala o lo o fausia nei, o eletise o lo o i ai fesoasoani faapitoa o lo o avatu, o le tele ia o fesoasoani na e avatu. E tataua ona faafetaia le Minisita o le Tupe i le tele o le stimulus package lea na

fai mo tatou uma. Ae aua ne i galo, o lea e faalagolago le Malo lenei i fesoasoani mai isi atunuu. Tuu ifo lava ia tatou ma le fesoasoani, e taua tele le mea lea i le tulaga o tatou lava taumafaiga ina ia fesoasoani tatou ia i tatou. O le a le uiga o lea mea? E le gata e te galue lava oe, ae avatu foi le fesoasoani a le Malo. O le ala lena o lea e faalagolago ai foi le Malo i o tatou tagata, tatou pisinisi ma malo mai fafo. O le tulaga lena ne i te i ua galo, o lea sa saunoa le Minisita e toe faamanatu mai le lauga tautaua lenei a le Peresetene o Amerika na lauga ai i le aso na faatauto ai, na ia faapea ai, “Aua ne i e fesili po o le a le mea a lou Malo e fai mo oe, ae fesili oe po o le a lau mea o fai mo lou atunuu ma lou Malo.”

Lau Afioga i le Fofoga Fetalai, o le tulaga lena, e i ai le tuaoi o le mea e mafai ona fesoasoani atu i ai le Malo i le tulaga o ana tupe maua. O lea lava e faafogafoga mai, e oo lava isi e mumusu e totogi a latou lafoga. Lau Afioga i le Fofoga Fetalai, e tatau lava ona tatou manatunatu loloto i le vaega lea, e fai a tatou talosaga i le Malo ae faitau foi i le lauga lea na avatu a le Minisita, e pei ua faataatiaese lava le lauga, lea e avatu ai le anoano o o fesoasoani ia e auala atu i le pau o le eletise, fesoasoani i le totogiina o nisi o tului o nogatupe, e aafia uma ai lava ma latou foi ia e fai a latou tamai fale turisi, lea e lavea uma lava i totonu o le Tala o le Tupe lenei. Lau Afioga i le Fofoga Fetalai, e pei e foliga e leai se mea o faia, e aafia uma ai lava le aufaipisinisi i totonu o le Tala o le Tupe lenei. O le mea la lena e fuafua foi a tatou saunoaga, faafesili mai i le sector lenei, tagata asiasi maimoa mai ona e tele le latou fesoasoani, tele le latou fesoasoani, e tele foi le fesoasoani a le tatou Malo e auala atu i le tax credit lea sa fai. O a polofiti tou te maua, e mafai ona toe faaoga e toe faalatele ai le pisinisi. A tau atu nei le fia miliona na alu i pisinisi nei e le totogia ni lafoga, lau Afioga i le Fofoga Fetalai, o le matua tele o galuega ia e fai a le Malo ua tatau ona fai mo latou. A o lea foi la ua oo mai i le taimi lenei o faafitauli, le taimi tonu lava lenei lea e taua ai le saunoaga a le Minisita i le mea lea o le aua ne i tuufaatasi au fuamoa i le ato e tasi. O lona uiga, o le tagata lava la faipisinisi turisi sa manatunatu loloto i ai i le mea lena, e le o tigaina tele, aua o le taimi lenei o la e ua apo mai e isi pisinisi o lo o fai pea, fai pea, e ese ai nai lo le mea lea. A o lea lava e taumafai atu lava le Malo, aua e tasi lava le mea lau Afioga i le Fofoga Fetalai – se i avatu sina au fesoasoani. Ina ua aumai le mataupu lenei ua amata ona afaina le tatou atinae lea, ua leva ona ou tautala soo ai i le mea lea, tuu i lalo, tuu i lalo, tuu i lalo a outou tau se i tau faatosina mai ai tagata, ia pei o Fiti lale, o le tuu i lalo o le tau, fai a outou deals faatasi ma le tatou vaalele e ola ai, ma fai tou package tuu atoa i ai i totonu totogi o le vaalele ma le totogi e tuutuu i lalo o hotels. Sa fai e isi, ae faataligatuli lava isi, e manao a ia faapea i luga le tau o le hotel room ona o ane loa lea o tagata o i Fiti, o i Cook Islands ae le omai i inei. E faafia ona avatu e le Malo le feau lea? A o le mea masani sa ou talanoa i ai, tuutuu i lalo le hotel rate ae soka pe a omai i meaai ma meainu. E tele auala e fai ai, lea faatoa fai nei lava, lea



faatoa fai nei lava ina ua afaina ua tau le omai tagata i fafo, ona faatoa tuu loa lea, tuutuu ifo i lalo mo tatou tagata. O le a la le mea lea e tupu? O la e tumutumu isi hotel i weekend i o tatou tagata. Ae talu ai le mea o le le fetuutuunai o le mafaufau i le toatele o lea e faitio, faitio, faitio i Saina ia e omai mai fafo, ae le tilotilo pe faapefea ona fai pisinisi a Saina e faataitai i ai. O le mea faigofie lea sa ou taua, na ona alu atu lava o le isi faipisinisi Saina faasima uma lava luma, faamanaia le mea e paka ai taavale, na o le o atu lava o tagata afe, afe, afe, a o la e palapala lumafale o isi faleoloa. Si tamai mea lava, ae ai loa kamupani Saina, ua leva ona tatau ona tatou faia. O la e ua ou vaai pe ua lua ea pe tolu tatou kamupani la e ua faata, la e ua faataitai, mo le mea o le le ala o le mafaufau i le faatinoina ma le faaolaina o pisinisi. Nei, na ou fesili atu i le isi hotel talaatu ananafi, ua fai se tou mea faapea? I, o la e ua fai. E fia le tau o le potu? O la e ua pau ifo mai le \$280 i le po i le \$250. Tuu i lalo i le \$100, pe tuu i lalo i le \$50, ona toatele ai lea o malo. E sili atu ona maua le tupe ma o atu ai o tatou tagata, o le tele ia o tagata ia e i totonu i inei, e tuu loa i lalo le tau ona o loa lea tafafao ai pe lua ni po o nonofo ai.

Lau Afioga i le Fofoga Fetalai, e pei o le tulaga lena, e le o tulaga ese le lauga lea ma le lauga lea na avatu e le Minisita o Tupe, lea e taoto atu ai fesoasoani lautele mo pisinisi uma e aofia ai le turisi, aofia ai ma beach fales.

**FOFOGA FETALAI:** Malo faafetai. Ia, ua manino mea uma i le saunoaga a le Malo ma le saunoaga a le Palemia, ae ina ne i avea ma lape foi i faitiaina ai le Fofoga Fetalai, o e silasila mai e tofu tatou ma le tusi lea. O i ai ni tou tusi? Le sui usufono lea mo Palauli Sisifo, o i ai sau tusi faapea? O lena e i ai, ia o le tali lena o mea uma lena e te tau tulai mai ai. Moi, ia. Toaga e toe faitau e manino ai mea...

Ia se i tuu atu le avanoa i le sui usufono mo Palauli Sisifo.

**Afioga Afoa Amituanai Faleulu Mauli (Palauli Sisifo):** Faafetai i lau Afioga i le Fofoga Fetalai. Ua ou tulai atu ou te fia faafetai i le Minisita lea o Turisi, faafetai i lau Afioga Sala mo lou faatuina o le 20 minute lea i le vaiaso na tea nei ina ia toe faaauau ai lau lauga a ua le talia e le vaega lea.

Lona lua, ou te fia faafetai atu i lau Afioga, o lea ou te manatuaina na o lau Afioga na e tagi i le Kapeneta e tuu se avanoa i faletalimalo e toe re-schedule ai latou loans ma toe ave se taimi se i totogi ai aitalafu foi nei ona ua silasila, e lavea i le tulaga foi lea o le financial crisis lea sa tupu nei i le vaitaimi lena. E le i uma atu le crisis lena ae piggi e le Tsunami le vaega lava lea, mafatia nai hotels, uma le Tsunami alu atu ma le afa foi lele lea sa lolovaia ai... uma lena alu atu loa ma le misela, alu atu ma le Koviti-19, ua le iloa... toe tapuni ma le tatou border... ia ua oti le mea.

**FOFOGA FETALAI:** Malie le sui usufono... Se se i faalogo mai i le Nofoa. Aua e te faalogo ia Olo ae faalogo mai i le Nofoa. E leai, ua lava foi lena tautala. Leai, malie le sui usufono... e le lavea mea na i ni faauilavea. E le lavea ai ni fesili, le lavea ai ni faafetai. E lavea le fesili i le mea e fia faamalamalama...

**Afioga Afoa Amituanai Faleulu Maui:** A lea ou te avatu le fofo o le faafitauli lea e finagalo i ai i le Tala o le Tupe lenei faamolemole lau Afioga i le Fofoga Fetalai...

**FOFOGA FETALAI:** Ia, o la e ua maua mai e le Minisita.

**Afioga Afoa Amituanai Faleulu Maui:** Leai e le i maua atu le aano o le mea lea ou te manao ai.

**FOFOGA FETALAI:** Malie le sui usufono, o lea ua ou faamuta atu le saunoaga. O lea ua manino leaga e te le o malamalama i a tatou Tulafono Tumau, i ou tatala atu le avanoa. Se faamolemole se aua e te faafofoga ia Olo ae faalogo mai i le Nofoa faamolemole.

**Tofa Olo Fiti Afoa Vaai:** Lau Afioga i le Fofoga Fetalai, leai na ou musumususu i ai, se taufai ma e silasila totoa, o la e saunoa mai le Fofoga Fetalai, ae fai pea oe.

**FOFOGA FETALAI:** Faafetai. Faafetai pe afai o sao le fautuaga Olo. Ae o le ala lena o le fai atu, o le tusi lea o le lauga a le Minisita o Tupe, o le tali lena o mea uma lava e oo lava i turisi, e oo lava i le au le atoatoa le malosi, o lea e i totonu uma lava i i. O le mea lena se faamolemole ua lava ia lea avanoa ua ou tuu atu ae se i saunoa mai le Minisita.

**Afioga Afoa Amituanai Faleulu Maui:** Lau Afioga i le Fofoga Fetalai, e le o i ai uma i totonu o le tusi lena isi mea e tatau ona faaleleia ai le mataupu lea faamolemole.

**FOFOGA FETALAI:** Ia, se i e Minisita foi oe o Tupe i se taimi.

**Afioga Afoa Amituanai Faleulu Maui:** Leaga e tatau ona faatonu aua o le taimi lenei o lea e faaletonu, ae se i ou Minisita ona ou faatinoa uma lea o mea ia e faaletonu.

**FOFOGA FETALAI:** Ia, ua lelei.

**Afioga Afoa Amituanai Faleulu Mauli:** O le stimulus package lea e i ai nei, e tatau ona fesoasoani i ai le tatou Malo e ave sina tupe e fesoasoani i nai hotels ia e faatino ai le mea. Ma lou faaaloalo

**FOFOGA FETALAI:** Malo. A lea na lavea i le saunoaga a le Palemia, ioe, o mea uma lava sa faatino ai faletalimalo sa i ai le fesoasoani a le Malo e le totogiina ni tiute. E amata mai i lena, faasusu, ia a o lea ua fafaga i le sipuni. Se toe faitau ona e malamalama ai lea, leaga o lea o le a alu ai le tatou taimi, a o mea na o lea ua uma ona kava uma e le Malo.

Ia tulai mai lau Afioga i le Minisita e faaauau le saunoaga.

**Afioga Hon SALA FATA PINATI:** Se faafetai lava Afoa, ia o uiga lava ia o le soifuaga, a leai foi Afoa e malie ai le Maota e le toē a.

Ua e taua le mea lea i le talosaga foi lea na ave i luga i le Palemia ma le Kapeneta e uiga i a outou faletalimalo a. Sole, e te le iloa mai lau tagi alii. Ia o lea o le a ou tago e fai atu lau tagi fai mai, (*na faataitai e le Afioga i le Minisita lana tagi i totonu o le Maota*), e faapena lau tagi na ou tagi ai i luma o le Palemia ma le Kapeneta, ae vaai la i ai, ua toe toe le vaega lena na o atu, leaga ua mataga ua ou faalumaina, ua ou tagi i luma o le Palemia. Faafetai i le Atua, a na tali lava, o le a le tali? Na faaola lava outou, e ui lava ina faaletonu. Faafetai i le Palemia ma le Minisita o Tupe.

Ia o le a ou toe see ese ne i meaane ua tu mai foi Olo faapea mai a mea e a. O atinae nei a le STEC. O le STEC sa i ai le upu foi lele ua masani ai tatou pei se... foi lele, e avatu i ai upu ae gau, tele tupe e alu atu na o le gau, gau, gau. Ua a nei? A lea ua tali le Atua. O le mea moni lava. E i ai le taimi e saili mai ai tai fia miliona a le Esetete o lo o i ai i ana faamaumauga. E le o au la, e le o se mea na fai e au. Faafetai i le Atua e le tuulafoaiina Samoa i atinae eseese ua fai, e fua mai i le Esetete. Sa faaletonu a o le Atua na te foai. O le tatou sogasoga ma lo tatou talitonu e ia i le taimi e tali mai ai. O lea lava ua faasolo ina tali mai. O lea ua uma ona saina le feagaiga o le vanila. O le JICA ma le kamupani lea a le Hokaido mai Japan o le a latou faia se... i Mulifanua i le Esetete e gaosi ai le vanila faapea foi le oketi (orchard). Ou te le tau tolaulauina ia Vaega o lea ua uma ona saunoa le Palemia i tupe maua. Saunoa foi le sui usufono ia Toomata i tupe ia e ono maua mai i le vanila. O eleele o le STEC, ua sanoa le sui usufono mai Manono, ou te faafetaia le Aiga i le Tai, o lea e taua faapea e le o solitulafono lo latou nuu i eleele lea e i ai le au squatters. E momoli atu ai le agaga o le faafetai. Ia o eleele faapea e maaleale lava aua e le o ni mea e patino i se tagata e toatasi, o i o fanua o le atunuu atoa. O e lei soifua mai o lea e i ai le latou piitaga i mea nei. O mea o lea e vaai e tatou, aua o lo tatou tofi o tatou o tausii mea a le atunuu, o tatou o tausii mea. Ia lufilufi lima lelei, fai le amiotonu lea aua nei faia i so tatou manao. Pei lava ona ou fai atu, e i ai lava le mau foe lea aua o le isi tagata e tautua fia matai ae e i ai foi le tautua tofi, o le tautua sili la lea, tofia, tofia oe nai lo

lou manao e fai le mea e te loto i ai ae ua le tusa ai. O le STEC la ua i ai le fuafuaga e lisi atu ia fanua. E i ai le township lea o le a fai i Mulifanua, o le aofai o eka ua atofaina mo lea Vaega i Mulifanua e 150 eka faafesagai tonu lava ma le malae tapolo foi lea e i le Aggie Grey i le taufaasiusiuga e agai atu i le uafu. E 516 poloka ua uma ona vaevae, o poloka la ia ua toatele le mamalu o le atunuu ua talosaga mai e fia maua ni o latou fasi fanua kuata eka e fai ai pisinisi. O lenei miti e taunuu, a o le fuafuaga masalo o le isi 20 tausaga ua tataua ona taatia le taulaga lea mo Savaii ma lea itu i sisifo o le tatou atunuu. Ia o le tau la o kuata eka mo pisinisi e \$718 i le kuata i le tausaga subject i le 30 tausaga e renew ai. A o vaega uma nei o lea ua taatia, o se fuafuaga ae e lei pasiaina e le Kapeneta faamolemole, na o se fuafuaga o lea ua i ai. Ia ma le 200 eka e vaevae tai eka e fai ai fanua mo faatoaga. Ia o nai Vaega na, o nei mea uma e le faatauina fanua ma lou faaaloalo lava sei tulou lava le maota. E leai se agaga e faatauina fanua o le STEC. O le SLC ma le isi Vaega o le Malo o lo o faapena foi ona i ai fanua o le Malo, e mafai foi ona lisi fanua na. Ona ou oo mai lea i atinae a le STEC, o atinae lea ua i ai, o lea ua i ai le ufi ua lata i le 1000 pue ua uma ona toto i le taimi nei, o le isi lea mau leoleoa. A i ai ni mala e ono tulai mai a o lava le taumafa lea o le ufi i atunuu ou te fai atu e leai se mea e popole ai tatou, leai se mea e popole ai. O le ufi, talo, fai, koko pe a ma le afe eka. O lea lava ua taumafai e faatino uma nei mea uma. O le a le agaga na ala ai ona fai nei mea? Ia aveese lo tatou manao lea fai mai ua le lava mea toto, ua le lava le tamaoaiga ua matitiva le atunuu. Ia o le a faapefea ona matitiva fai mai toeaiina, o i lalo o mati ma le aoa e...o iina e i ai taavale afi, ae ou te iloa e sao lelei. O aso ia sa fai le faatoaga ae a totogi atu lo matou aiga e \$13 i le lua vaiaso, \$13 i le faletupe. Ona alu atu loa lea ou fai atu, vaai aumai ni au fagupia ona alu loa lea. E 2 pusa pia ae fai mai ua leai se tupe ua uma i pusa pia ia e 2. Ia, ta o loa e fai le faatoaga, o le faatoaga, maua mai loa le talo ave i Niu Sila. Aumai le talo muamua e \$500+ le tupe na maua, toe sau le isi talo ua faitau atu i luga. Ua i ai le faitau foi lele, ua sau lava le tupe mai fafo e lei taitai ona uma le tupe lea na aumai muamua i isi talo. O le uiga lena o le soifuaga o tatou, o le tatou vaai foi lele se o le faifaatoaga e leai ni tupe. A sau lava le tagata mai Savaii ma si ona ieie foi lele ona alu atu lea i le faletalimalo fai mai, se faamolemole tama, e le tagi, leaga e palapala ou laei, ia ae fai atu si toaina, 'se e le afaina o lea e ... leai, e sa oe i totonu.' Ae galo ai, o le mea foi lele e faapatu i le ie masalo pe tai fia selau pe \$1,000 la e i ai. Ia, Samoa lou atunuu, aua ne i galo le mitamitaga, o tatou uma, o le fesili pei ona ou fai atu, e te le alu atu i fafo e faapea mai, o ai oe? O oe o le papalagi po o oe o se afakasi? Leai, o au o le Samoa.

Ia, ona oo mai lea i le biomass. O le biomass lea ua i ai, ua tele le tupe, ua faitau i le \$20,000 le tupe a le Esetete lea ua i ai i le taimi lenei i le eletise lea, aua o lea ua alu le eletise i totonu o le EPC. Ioe. O le feagaiga lea ua uma ona osi, e 50 sene i le kilowatt le mea la ua faatau ai. A fua i le tai \$1 la

e fai ai le solar, o le matua taugata o le mea lena, a o le faaola totoga lea e i ai, o ai? O lea e tu lava ma fai le galuega a le Esetete, e fai alofa, fai alofa i le atunuu.

Ona sau loa lea i le maketi, ua maea ona faatau le fanua a le Esetete i Otahuhu, ma ua faapena ona uma ona faatau. O le taimi nei o lo o fia tatala ae o le faaletonu o le Koviti-19 lea e i ai. O le faamoemoe foi o le Malo, e le na o le Esetete e galulue i i e tatala i le atunuu, tatala i le au faatau talo. O ai lava le tagata e malaga i Niu Sila ae leai se mea e teu ai le talo, o lea ua i ai le property a Samoa e faasino i o tatou lava tagata leaga le mea lea ua leva ona taumafai mai, a sau loa le palagi e manao e avatu le container lea e i ai le talo, ona dump uma loa lea o le talo i fafo a tatou, ae faafoi le container a le palagi. Ae a le mea lea ua taumafai i ai tatou? Ia store i i ma faatau ai lava au oloa. Ae le faapea la e fai fua, e totogi foi le lisi, e fai foi e o le a tofia le na te vaai le maota lea i Aukilani e faamaumau uma ai mea uma nei. Ae pei ona ou fai atu, e fai mo Samoa. Samoa mo Samoa.

Ia ou te masalo ua maea se tala i le Esetete ma ia vaega.

**FOFOGA FETALAI:** Ia se i tulai mai le Palemia. Malie lau Afioga.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, se i malolo le alii Minisita, o le itu taua lava mo le silafia, o le faalua lea ona tatou asiasi i le tulaga lea o le i ai o se fanua o le Esetete Tausi. O le taimi muamua, e 2 tatou fanua na i ai, ma sa fai foi mo le faatauina ai o oloa tau faatoaga a le Esetete Tausi. Ona alu alu loa lea ma iu ina leai se tupe a le Esetete Tausi na maua mai ai, ua gau. E 2 la nofoaga, o le isi nofoaga e tulata i tai i le taulaga, sa toai taunuu atu i ai faaleeleaga ma teu ai, foi lele mo le faatau atoatoa, ia ma le tatou fanua e faatau ai foi lele tulaga faa-oloa e lau atu, o le mea na o o i ai, na o le gau faalausosoo. Ae i ai le mafuaaga ua toe lalaga ai le itu lea, talu nei ona tele le talo, ma ua oo mai foi le aufaitalo ma talanoa mai ai i le tulaga lea, e tatau lava ona i ai se tatou lava faleoloa. O le mafuaaga, o le tele o faleoloa ia e i ai nei, o faleoloa uma a le au Initia i Fiti. O le tulaga la ua oo i ai, ua sosolo atu i ai ma le itu lea o le faimea faapito mo le latou lava atunuu o Fiti. E i ai la taimi e avatu ai tatou talo ua mumusu e faatau faleoloa ia e retail ai le talo. A o isi taimi, ua avatu le tatou talo, o le lipoti lea e aumai ia te au, ua aveane le talo susu a Fiti ua tau o talo a Samoa ae avatu le tatou talo ona tau lea o talo a Fiti. O le lipoti lea mai nisi foi o le tatou aufaitalo o lo o taumafai e faatau a tatou talo. O le avatu foi o containers ma tuu i tatou fanua la e i ai e le o se mea lelei, ua vea ma mea foi lele ua le taualoa ai tatou aemaise le mea o lo o i ai le tatou konesula, tumutumu atu ma palapala ai le nofoaga, e le matagofie i le vaavaai atu a le lautele. O le la ua fai ai le faaiuga ina ia i ai se faleoloa lava mo le agai atu i le lumanai o le a agai tasi atu i ai faaleeleaga ia a le Esetete Tausi ona ua ese le tulaga

lea ua i ai le Esetete Tausi ua tele a latou faaeleeleaga ua fai, aemaise la oloa ia e aofia ai le talo. E faapena foi la ona tatala atu i le toatele ia o i latou o lo o ave le talo, ae leai se auala e faatau atu ai, se i vagana o faleoloa lava ia o le au Initia e le lelei la mo tatou, mo Samoa.

Lau Afioga i le Fofoga Fetalai, o le ala lena o lea ua toe foi ai tatou i le mea sa tatou i ai muamua, o le eseese o ituaiga investment ia, e le faapea e alu i lalo le tau o eleele, e agai pea i luga tau o eleele, aemaise fanua nei e tonu i le ogatotonu o le mea e fai ai faatauga a tagata i le maketi. O se fesoasoani lea a le tatou Malo, e le gata mo le toe atiae o le Esetete Tausi ua maoae le tulaga lea ua i ai i le toe lalagaina o latou faatoaga, aemaise lava le talo. O lea ua faafogafoga mai i ufi ma isi tatou faaeleeleaga, ae o lo o manaomia foi e le tatou fai talo taitoatasi, lea e o atu tau sue solo se mea e faatau ai a latou talo. Lau Afioga i le Fofoga Fetalai, o le background lena, mafuaaga e taua tele ai, ia le faatupu manatu mai o le Afioga i le Minisita i le Kapeneta, ae faapea foi galuega lelei o lo o faatino e i latou o lo o galulue i le Esetete Tausi.

Lau Afioga i le Fofoga Fetalai, o le faamalamalamaga lena ina ia malamalama i lo tatou Maota. O la foi e matau mai e isi, sa i ai o tatou fanua faapea, ona faatau ese atu lea e le Malo, ona o le tele o le gau o ia foi faigapisinisi sa fai muamua. O le taimi lenei, o lea ua toe tuu mai le avanoa aemaise lava o tatou tagata ua tuu atu i ai le avanoa e ave ai latou talo e faatau i le maketi i Niu Sila, i le mea o lo o tumutumu ai o tatou tagata e manaomia tele le tatou oloa, faapea foi ma isi tagata o le pasefika e taugasami i oloa o lo o avatu nei i totonu i le tatou atunuu. I le tulaga o lea ua agai i luga faaeleeleaga o le tatou atunuu.

**FOFOGA FETALAI:** Malo faafetai, ona o lea ua tatou toai taunuu i le tatou malologa masani. E i ai le manatu ua manino auofala i le saunoaga a le Palemia. Ae momoli lau saunoga i le Minisita, e faaauau pe a talii mai le tatou malologa. Ou te faasilasila atu, ua faataatiaese galuega a le Fono Aoao mo lana malologa masani.

*Na faataatiaese Galuega a le Fono Aoao mo lana malologa masani i le itula e 10.45 i le taeao ma toe faaauau i le itula e 11.25 i le taeao.*

**FOFOGA FETALAI:** Ou te faasilasila atu ua toe amatalia Taulumaga ma galuega a le Fono Aoao Faitulafono. E faia le tatou malologa o faapena ona saunoa le Afioga i le Minisita o Tagata Tafafao Maimoa mai fafo. Ae ou te le i tapa le Minisita, ou te muai tapa le Taitai o le Malo, o le Taitai o le Maota mo se lafo, mo le tatou galuega.

## LAFO MO LE SUIA O ITULA FONO

### **Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALILEGAOI:**

Lau Afioga i le Fofoga Fetalai, ou te tulai atu ma le agaga faaaloalo, e momoli atu le faafetai i lau Afioga faapea foi le mamalu o sui o le Fono Aoaofaitulafono. O lea ua uma si a tatou malologa, ae a le faasiligamalosi mo le faaauauina pea o le tatou Tauaofiaga i le Tala Faatatau o le Tupe. E pei ona silafia, o lea o lo o faagasolo pea ia le tali atu o Minisita o le Kapeneta. E leai foi se agaga e faatopelau ia mataupu sa laga e sui mamalu o le Maota. O le taua lena o le tou finagalo ia te au, o le sui Palemia faapea foi ma Minisita o le Kapeneta. O le a tali lava i le atoatoa ia mataupu e pei ona matau mai, masalo foi e le iloa pe le umi foi sau tali atu, aua o lea ua cover uma e le Kapeneta le tele o mea. A umi pe na o sina 3 itula. O le tulaga taua lea o le tatou felafolafoaiga. Ae le o laaloa foi lau Afioga i le Fofoga Fetalai, le vaai totoa i le tatou Tulafono, o lo o faataatia mai ai. E tataua ona faamaonia le Tala o le Tupe lenei i le aso a taeao. Ua outou faafogafoa, ua ou le iloa po o ua faafia ona tapuni e le Malo atoa o Amerika, ua leai se budget, e pasia e le Maota Faitulafono e le Congress.

O lea la, e toe lava o taeao, a le pasia taeao le Tala o le Tupe, ua tapuni le paketi. O le mea la lea lau Afioga i le Fofoga Fetalai. E i ai le taofi, e uma loa le matou tali atu, ona tatou see loa lea i le tulaga faale-Komiti o le Fono Aoaofaitulafono, ina ia tatou auiliiliina loa le paketi. E toe toa 5 matou ia e totoe, a maea loa la ia matou, e i ai la le agaga faapena. Ae o le tele foi o tausaga ua tuanai, ua ou vaai i ai ma ou sit through, na ou saofai i totonu o le Palemene lenei na oo lava i le 4 i le vaveao le Fonotaga. Tatou te le i faataitai la i ai. O lea ua maua le taimi tatou te faataitai i ai, se i tatou malafoni te isi e aoga mo le agai atu i le lumanai, i mea nei o le fetuunaiga o le tofa ma le faautautaga loloto i le faagasologa o le tatou galuega.

O le tulaga lea ua ou tulai atu ai ma le ava tele lau Afioga i le Fofoga Fetalai e faatu le lafo, e suia ai a tatou Itula Fono e faapea, *Ia faataatiaese Taualumaga a le Fono Aoaofaitulafono i le itula e 1.00 i le aoauli nei, ona toe faaauau lea o le tatou Fonotaga i le 3.00 i le aoauli nei, seia aulia lava le ta o le 11.00 i le po nanei. E malolo i le ta o le 7:00 i ni nai minute, ona tatou toe amata ai foi lea. Lau Afioga i le Fofoga Fetalai, o le a lava le mea e... a ta le 11.00 e le i pasia le paketi, ona tatou malolo lea e pasi lava taeao. A pasia uma a tatou mea e le i taina le 11.00, ua tatou malolo lea, ona tatou agai loa lea i isi mataupu fou i le aso a taeao.*

O le lafo lena lau Afioga ma le agaga faaaloalo.

*Faaluaina e le Minisita mo Pisinisi, Alamanuia ma Leipa, Minisita mo Tina & Tamaitai Atinae o Nu'u ma Afioga ma Agafesootai ma le Minisita mo Galuega, Felauaiga ma Atinae Eseese.*

*Na faamaonia le lafo.*

*Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 3) 2019/2020 ma le Tulafono Tau Faaofi o le Faatatauina o Tupe 2020/2021.*

**FOFOGA FETALAI:** Ua manino le faafofogaaga a le Palemene aemaise foi o le faafofoga a Ofisa Sili o Pulega o Matagaluega ma Faalapotopotoga a le Malo, ma le tapuaiga a Samoa. E malolo le tatou galuega ma le Fono nei le 1.00, toe amatalia i le 3.00 i le aoauli nei, seia paia le 11.00 i le po nanei. Afai lava e vave le tatou galuega, e faapena lava ona vave manava foi ona o le tulaga o le aso mulimuli le aso a taeao, e tataua ona oo atu ai ua pasia le tatou Tala o le Tupe.

Ou te tapa lau Afioga i le Minisita o Tagata Tafafao Maimoa mai Fafu, e faaauau le saunoaga, masalo e le o toe umi foi le saunoaga.

**Afioga Hon SALA FATA PINATI:** Lau Afioga i le Fofoga Fetalai, ou te faafetai i le Atua i lona agalelei, o lea ua maea le taligasua, e pei ona i ai le faasiligamalosia i lenei itula o le aso. Ona ou manatu lea, masalo pe a ma le toe 2 itula maea lau tautalaga i lenei itula o le aso.

Ae ui i lea, o le a ou taumafai ia e faapuupuu atu, ua vevela foi le fala ma ou te talitonu ua faasolo foi ina maea ia...ae ou te fia tali atu i le saunoaga a Faumuina e tusa ai ma aualea ia i mataaga, ia faafetai Faumuina. Ou te manatu lava o tulaga e pei ona e aumaia, o le mau foi lena e pei ona i ai le tatou Matagaluega, ia faailoa atu ia Samoa i isi tulaga e le i i ai se talitonuga o i ai se mataaga faapea i totonu o Samoa. Aua ou te talitonu o Samoa lava ia, o le Penina o le Pasefika. Ioe, e fai mai foi Tonga ia e ese foi le latou tau e matagofie. Ae ua ou vaai ia Samoa, e leai lava se motu o le Pasefika e o ma tatou, i le matagofie. E fai o le matagofie o tamaitai, e pei ona molimauina e tamaitai o le Maota aemaise ai foi Ofisa Sili o Pulega o Matagaluega. O nisi taimi ta te faapea, se maumau pe ana faapea o la te toe talavou, ae faigata ua sau le matua. O le fesili lena, se talofa...soia ia, e i le Atua e pule le Atua ia i tatou.

Ona oo lea o se faamatalaga lau Afioga i si o matou itumalo le afioga o Tama suafa le afio o Satuala, le la Maopu, faapea foi ia Falesefulu ma Falevalu, Tevaga ma Vaifale, afio foi oe Salemuliga. O le a le mea o le a ou toe faalupe ai...



**Afioga Hon Sili Epa Tuioti (Minisita o Tupe):** Lau Afioga i le Fofoga Fetalai, o lea e matau atu o le a faaiu le saunoaga a le Afioga i le Minisita.

**FOFOGA FETALAI:** Saunoa ia le Afioga i le Minisita.

**Afioga Hon Sili Epa Tuioti:** Leaga o lea sa tele le talanoaga i le tulaga i le stimulus package. Le fesoasoani a le Malo ia tatou pisinisi o faletalimalo ma tulaga faapena. Ae na ona fesoasoani atu, e faamanatu i le tulaga i le tele o le sao o le Malo i le atinaeina o tatou faletalimalo, ma i latou foi o lo o asiasi mai. Aua o le tatou atinae lava lea o lo o pitosili ona tele lona sao i le tatou tamaoaiga. E pei foi ona silafia lau Afioga i le tulaga lea o le tatou tax credit, na amata mai i le tausaga e 2003. E tusa e oo mai i le taimi lenei, e \$142 miliona ia tupe o tax credit, o tupe ia a pisinisi foi ia o lea ua maua a latou polofiti, sa tatau ona totogi le tax i le Matagaluega o Lafoga ma tupe Maua, ae ona o le Tulafono sa i ai i lona taimi, ua mafai ona avatu e invest i totonu o tatou faletalimalo tetele. O le taimi lenei ua \$75 miliona ua faaaogaina, ae o lo totoe le isi 67. O lona uiga o se vaegatupe tele, e ui o se fesoasoani tele lea i le atinaeina o le tamaoaiga, ma le tulaga o le Tourism Industry ia ao tupe foi ia, ua le mafai ona alu i totonu o le Ofisa o Lafoga, e mafai ai ona fesoasoani i le faatupeina o tatou atinae ma le Tala o le Tupe. O le tulaga lona o lo o talatalanoa foi, masalo ua oo i se taimi ua tatau ai ona faamuta vave lenei vaega, ae toe faafoi mai vaegatupe ia, ina ia faapea ona faatupe ai le tatou Tala o le Tupe, aemaise nisi o atinae tetele e pei o Aoga, o le Soifua Maloloina ma isi auala faapena, e mafai ona faaaoga i ai nei vaegatupe. Lau Afioga i le Fofoga Fetalai, sa talanoa foi i le tatou stimulus package, i le tulaga lea o le totogiina e le Malo o le 2% o tului o nonogatupe faapisinisi e aofia ai faletalimalo i totonu o commercial banks, mo le 3 masina. O lo o faapena foi le tulaga ua i ai le vaegatupe e fesoasoani ai i le aoaoina pea o i latou sa faigaluega i totonu o le Tourism Sector, ae ona o le tulaga foi lea ua faaitiitia itula galulue po o nisi foi ua vavae mo sina taimi, ae maua ai avanoa e toe o ai e toe fai ia aoaoga ma maua ai tupe. Lau Afioga, o le isi fesoasoani o lea sa faalauina foi, o le tulaga lea ua avatu tupe e fesoasoani ai ia i latou ua vavaeese mai galuega ona o le tulaga ua tapunia, e le maua mai ni tatou tagata turisi, po o i latou foi ua faaitiitia ia itula e galulue ai. O se fesoasonai e taua tele, ina ia mafai ona oo i se taimi i le alofa o le Alii, e toe faatupulaia ai le tatou tourism, ma tatala foi le tatou borders, ia mafai ona toe foi atu latou i galuega, e maua ai tupe maua mo aiga. Lau Afioga e i ai foi le tatou fesoasoani i le tau o le eletise, e le gata i aiga taitoatasi, ae faapea foi i le Private Sector, aemaise lava i pisinisi ae faapea foi i faletalimalo. Aemaise lava mo faletalimalo tetele e 50% ua faaitiitia ai se vaega tele o nei pili. O lo maua mai pea ia talosaga a nisi o faletalimalo tele ia e i ai le Sheraton ma.....

**Afioga Fuimaono Teo Samuelu Teo (Falealili Sasae):** Lau Afioga i le Fofoga Fetalai,

**FOFOGA FETALAI:** Malie lau Afioga i le sui mamalu, se i tuu atu pea le avanoa i le fesoasoani a le...o lea e saunoa le Minisita o Tupe, e faamalamalama mea sa laga i le saunoaga a le Minisita o Tagata Tafafao.

**Afioga Fuimaono Teo Samuelu Teo:** E pei o le agaga lea, o lea e taumafai atu ai e tau fesoasoani atu ai, ua uma ona faamanino ma faamalamalama. Masalo ua faamalamalama faa 2 faa 3 mai lea, ne i te i ua gasea le Afioga i le Minisita, ae ua uma ona oo i le ogasami lea. O le ala lena o lou tulai atu ma le agaga faaloalo.

**FOFOGA FETALAI:** E tasi lenei sui usufono e sili ona lelei i totonu o le Palemene, e le gata i le mataala. Faafetai lava i le sui usufono mo Falealili.

**Afioga Hon Sili Epa Tuioti:** Faafetai i lau Afioga, ia faafetai foi i le Afioga i le sui usufono. O le faamanatu ia i tatou lava nei, ae o lo o faafofoga mai foi le toatele o le atunuu, aemaise lava i latou e ona pisinisi nei, leaga o lo o fai lava ma tusi atu foi ma o atu, i se tulaga e fesoasoani atu ai ia i latou. O lo o i ai foi le tatou fesoasoani i le tulaga i le Kamupani Vaalele, e pei ona silafia, atonu o le a saunoa i ai le Afioga i le Minisita, ia o lo o avatu i ai le fesoasoani ia faapena ona faatino ia le atinae e taua tele mo le tatou tamaoaiga. E faapena foi le Waterfront Project lea e i tua ifo o le Maota o le Malo ma lumafale, o le tulaga foi o lo o ua galulue le Ofisa o Tupe ma talanoa foi ma le Matagaluega o le Samoa Tourism Authority, ia le tulaga o le a faatele ai se siitaga o le vaegatupe, e avatu e tapenapena ai pe a oo i le taimi o le a toe tatala ai tatou borders, ina ia faapea le faalauiloa, ma le puipuiga lava o lo o i ai, e le tuulafoaiina lena atinae, e tataua ona tuu i ai se vaegatupe tele ina ia faapena ona vave faalauiloa. Lau Afioga o le tele ia o tatou atinae tetele, o le tatou malaevaalele, ma auala ma tulaga faapena, o mea uma lava na e aoga, aua le saogalemu o le feoaiga e le gata i le tatou atunuu ae faapena foi i latou o asiasi mai, nonofo i tatou faletalimalo, ma faaalu se tele o latou tupe e fesoasoani ai i lo tatou tamaoaiga. O le tulaga lena, ua ou tulai atu ai, e faalavelave o le a faaiu le saunoaga a le Minisita, ina ia toe faamanatu atu lava, o lea sa tuu atu i totonu o le Tala o le Tupe ma le stimulus package. Ma le faaloalo lava.

**FOFOGA FETALAI:** Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga

Fetalai, o lea e matau atu ua malamalama le Maota. Ae o mea nei e fai si lavelave, e le o malamalama tatou tagata i tua. E ao ai lava ona faamalamalama pea ma faamalamalama pea. Ina ia matua manino lelei o le \$142 miliona lea, o lafoga ia sa tatau ona totogi mai i le Malo ia manino lelei, o lafoga ia a faletalimalo i luga o latou tupe maua polofiti, sa tatau ona totogi mai i le Malo, \$142 miliona, se i tagai i ai i le tele. Ae o lea ua faamatuu e le Malo i lalo o le Tulafono, e ave ai le fesoasoani e atiae faletalimalo, ia toe fau faatele ma faaleleia atili a latou faletalimalo, i luga o le talitonuga lea. O le atinae lenei o lea e tele tupe e maua mai ai. O lea e tele a tatou galuega, o lea e tele tupe ia e maua mai ai, lea e tele tupe e faagaga mo fefaatauaiga. O le mafuaaga la lenei, o le a le mea lea ua tupu i le \$142 miliona lea? na o le \$72 miliona ua faaoga. A o fea lea e i ai le isi \$67 miliona? Ua leai se mea, o mea ia e tatau ona faaoga e faletalimalo, lea la e mafua ia ona le faaoga uma le \$142 i le taimi na fai ai le Tulafono ma avatu le fesoasoani. O lona uiga, o faletalimalo nei, ua latou faaogaina le \$67 miliona i isi atinae. O lea la e toe tatou mai ai e toe tuu atu se avanoa se i toe saili ane se isi mea e faatumu ai le mea lea, fai ai a latou atinae. Ae ua ala ona ou talanoa atu lau Afioga ina ia malamalama lelei le mea lea, i le tele o le fesoasoani a le Malo na avatu i ai. Aua ua tatau, ua matua tatau lava i le taimi lea, ua manao tele le tatou atunuu e uunai le atinae lea, ia tele tagata. O le ala foi lenei na tatou o ai i le uunaina aumai le tatou vaalele. E le laititi la le...o lea ua faafogafoga mai, e oo mai nei lava o la e gau lava le vaalele. O lona uiga la, e tasi lenei fesoasoani a le tatou Malo, ina ia toatele mai tagata e o mai. Ma o le tulaga lenei lau Afioga i le Fofoga Fetalai, e pei e galo ia i latou, e i ai lava le ituaiga tautua, po o le a lava le faaletonu, ae uunai lava pea e le Malo leaga o lea e faalagolago uma i ai atinae eseese nei, o faletalimalo, o faleaiga, faleoloa, o tatou aufaifaatoaga, o tatou aufaifaiva, aua e o ave ifo mea nei i faletalimalo, ina ia ola ai. Lau Afioga i le Fofoga Fetalai, o le ala lenei e ala ai ona taua tele i le Malo, le tapa o le \$142 miliona lea, ina ia uunai ai faletalimalo ia ola, ma ia maua ai pea galuega a o tatou tagata. O le toe faalautele atu lenei lau Afioga i le Fofoga Fetalai.

**FOFOGA FETALAI:** Malo, tulai mai le Minisita mo Tagata Tafafao Maimoa mai Fafao e faamaea mai lau saunoaga.

**Afioga Hon SALA FATA PINATI:** E momoli atu le agaga o le faafetai i le Minisita o Tupe faapea foi le Afioga i le Palemia. E leai lava se saunoaga, e moni ma faamaoni mea lava e pei ona saunoa i ai. Faafetai foi i le uso mai Falealili, faafetai Fuimaono. O lenei toaina e tu mai lava e saunoa mai foi e mamalu ma malualii si alii. Malo Aualiitia, malo le saunoa. O le tulaga e pei ona i ai le tatou atinae, o lenei ua avatu uma lava le ata e pei ona i ai atinae o tagata tafafao. O le talitonuga lava o le galuega e fai faatasi. O le galuega lenei e le o se galuega e patino na o e o lo o faauluulu i ai le galuega lenei.

O le galuega lenei e fusia faatasi i ai le atunuu. O i tatou nei o sui mamalu o le Palemene o Samoa, o sui usufono ua uma ona tusi aao i ai le atunuu, a o lo o i le Atua foi, ua uma ona i ai lana filifiliga, ua mafua ai le aso. O a foi mea e tutupu, e tupu lava i luga o le talitonuga ia tatou tutu faatasi. United, divided e leai se tatou mea e maua ai. E pei o le agaga lea e momoli atu ai le faafetai. Faafetai ia outou Afioga i le lava papale mai, malo le tautua, e leai lava se isi e tali atu, na o le Atua e tali. O a tatou galuega lelei e fai, e fua i o tatou aiga, fua ia tatou fanau. A o tatou faaletonu, na e i ai le upu foi lea, e a le matua e ai le vine moto ae magiagia ai.....e le tau fai atu i lena vaega. A o le mea moni lava, tatou fusia le atunuu ma o tatou faapea ifo, o le a se mea ua o tatou mafaia, ia tatou lafo maa faatasi, ia tatou lafo maa faatasi e tausoa la tatou avega. O le avega e le mama, o le avega e faigata. Ae o le lumanai e suamalie, ia a tatou galuega pe a faamaoni, ma o tatou faia mea silisili, ia maua ai se ai o le Atua.

Lou itumalo, ou te le selu atu, ou te le pei o le manu foi lea e lele lava ma vivii ia, o le a foi se galuega a la outou sui usufono, ona pau o se mea ua pau mai ai le mafai. Ae tatou ave lea i le Atua, o le Atua e pule, o le Atua e foai o le Atua na te aveese. O mea uma ua ou maua ma ou faia mo le itumalo, o le Atua lea e i tua. O mea uma ua tatou galulue faatasi ai, tatou ave lea ia maua ai se viiga o le Atua. Si ou itumalo fou o Aleisa, o lea ua i lalo o le faamalu o Satuala, aiga ma le tatou nuu i Aleisa, o lea ua ofo mai le Minisita o Galuega, i o tatou auala faapea le suavai. Masalo e le o toe mamao, pe a ma le toe 3 vaiaso ona faapena lea ona tatala le vai i Aleisa i sisifo, sosoo ai lea ma Aleisa i sasae, ma outou galuega ua faapena ona talosaga mai ai i se malae. Ua uma foi ona ou talosagaina le Minisita ia Lautafi, i se fasi fanua e fai ai se malae soka ma se malae tapolo ma so o se ituaiga malae lava mo Aleisa. Si ou itumalo talofa, se ua ta sela ifo i le tau mafaufau po o a isi mea e aoga i ai lo outou sui, e ui ua tuulafoaia e lo outou sui mamalu sa outou filifilia le tatou itumalo. E le i oo i le taimi e faaipoipo ai le tatou itumalo. Ae ui i lea, se o le Atua e pule, e galue le agaga o le Atua ia i tatou uma. O le a se mea ua ou mafaia o le tatou sao lea. Ioe, ae mo lenei taimi, e momoli atu le faafetai, si o matou nuu o Leauvaa, lena e le o toe mamao ae maea lo tatou faleaoga. O le auala ta lena o le a toe fuafua atu aua le faleaoga, aua tou te popole, o lo o i ai le faamoemoe e afio atu le Minisita i lea vaiaso ma ma savalivali atu e faatino ia vaega. O a nisi galuega o totoe, e le uma le fai aso o le Alii. Ae talosia, ia faapena ona faamanuia mai le Afioga i le Taitai o le Maota faapea foi sui mamalu o le Palemene. Si ou nuu i Savaii, o lea e musumusumu mai ou te faamavae atu, e le i oo i le taimi e fai ai faamavaega. E i ai isi fonotaga i le lumanai, ae e le galo oe, a faapefea ona galo, o lo outou sao lea ua ou tulai atu ai. Ioe, e le nofo nofo ou sau i i, Gagaemauga Nu 3, tasi lea aso o le faapapalagi, ua aveese mai ai au mai Savaii. A o le olaga atoa e tumau pea le tatou nonofo ai i le tatou vatapuia ma si o tatou nuu,

tuafale faapea tama suafa. O le viiga e foi pea i le Atua. Ia manuia le usugafono i lenei aso faafetai.

**FOFOGA FETALAI:** Malo faafetai. E manatu le Nofoa e ao ona tuuina atu le avanoa i Minisita e oo ai i o latou itumalo, aemaise Minisita o lea ua toe fesuiiai itumalo faapalota, e ese mai itumalo faa-alalafaga e pei ona sau ai. Ae o le manatu lava ia o le Nofoa o a ni mea e faapena, e fetuunai lava e le aiga Kapeneta. O aso sa sau ai, sa faapena, ae ona o le fesuiiaiga lea talu ai nei, o lea ua manatu, tuu atu pea le avanoa, ae o le tulaga lena, e manumanu i le tausiga o le tatou Fonotaga. Ia ui i lea, e faapena leaga o tatou e le pei o palota a atunuu la i fafo e fua i le vaega foi lea e le o.... ma e leai ia so latou aganuu, e fua i la tatou aganuu, e fai o e faalele, ia ae o e foi e matau. Ia malo faafetai, e na o se faamanatu a le Fofoga Fetalai. Ia ua oo mai le faasologa i lau Afioga i le Minisita o Tina ma Tamaitai

**Afioga Hon TUITAMA TALALELEI TUITAMA (Minisita o Tina & Tamaitai, Atinae o Nuu ma Agafesootai):** Lau Afioga i le Fofoga Fetalai, ua sausu fiaele le manu nai Utufiu. Ae o le a le naunau i le lauamanu, ae faatali mo le faamulioatu. E ui ina nanau faalupe o tafa naumate, ia se lagona ina ia alualu loa se faamatalaga, e manatua le mavaega nai Pulotu. A paia le pa i Fualaga, sua se tuli aua se alii tu le alii o aiga.

Ae ou te le i asuina la le vai na momoo i ai le Tuiatua na i Mulinuu o Sepolataemo, e mua ona ou taia le tafaitoa, ma ou faapoipoi laau tu i vanu, e faigata, ua malu maunu ia lo tatou Maota. Ua papae le fogatao, a ua taooto tia i paga, ua maualuga foi le paega o tiasa i ulupaga, ua taligaliga ia le gataifale. Ua talaga pasina le aso, ua pafuga le a, e pei o le faiva o Suegagogo. Ua popo moli i futiafu e tasi, ua atoa usu, le taeao fuluula le gatoto.

O lea e afio lau Afioga i le Fofoga Fetalai, afio foi le Afioga i le Palemia, o le Taitai o le Maota lenei. Afio ia le Afioga i le Sui Palemia, Minisita o le Kapeneta, Afifio foi Minisita Lagolago, faapea le mamalu o sui usufono o le Fonousu a Samoa. Le Failautusi o le Fono ma le Ofisa o le Fono Aoao Faitulafono, le tapuaiga i Faauluuluga o Matagaluega ma Faalapotopotoga a le Malo, tulouna ia, tulouna lava.

Ou te faatalofa atu foi, i le faafofoga tapuai mai a le Ao Mamalu o Le Malo o Samoa ma lana masiofo, faapea foi le Sui Fono a Sui Tofia, le Faamasino Sili, le Peresetene ma le Ofisa o Faamasinoga, e atoa i ai le Tafatolu Fefaatauagai o le tatou Faigamalo.

Ua le o mala, ou te faapea foi ona faapai atu ma le agaga faaaloalo tele, i le faafofoga tapuai mai a lo tatou atunuu. Le Paia i Tama ma o latou Aiga, o Aiga ma a latou Tama, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

O Samoa ua uma ona tofi, o paia ma sa e le toe faamatieina i sou leo faatauva. Ae o le fatuaiga tausii lena, a faleupolu tofia, totooouli ma le aufueloloa o Samoa. Le aufaigaluega paia a le Atua o lo o talafaaauto ma faafaletuluaia i tulimanu e fia o Samoa, faamalo faafetai, mo le galuega faifaiepa, o le tapueina o le soifua faaleagaga o le tatou atunuu, e Faavae i le Atua Samoa. E le faagaloina la outou tapuaiga.

Lau Afioga i le Fofoga Fetalai, ua maea ona e osi le taulaga, ma ua momoli foi laau i Foga. E mafaia e le Atua ona faia mo i tatou mea uma lava e le mafai ona tatou faia mo i tatou. Ao le fesili, o le a se mea e mafai ona tatou faia e le mafai e le Atua ona faia mo la lava?

Lau Afioga i le Fofoga Fetalai, a lea ua tu mai lagi le lagi, le lagaali a Tamafaiga. E pau lava lea o le tatou sao e fai mo le Alii, o le ositaulga. Faafetai ua faafofoga le Atua, o lea ua e molia ia le tatou taulaga i le Atua ia aua ia le tatou vatapuia. O le mea lea, ia faafetai i lau Afioga i le Fofoga Fetalai. A le ua le o mala, ae o manu ua laga. Lea ua tatou sapi ai nei i lagitau, tatou siva i maa o malie. Ia faafoi la le viiga i le Atua, ae o le a liuliu ala o le lupe, e tali atu i mataupu na laga e sui usufono, e tusa ai ma le tautua a lenei Matagaluega o Tina ma Tamaitai, Atinae o Afioga ma Agafesootai, aua ni mataupu na laga, o le a ou tali atu i ai, i lona tulaga aoao tetele.

Lau Afioga i le Fofoga Fetalai, ia ma ua i ai le manatu o le a ou amata atu i taiala e pei ona laga i totonu o lenei Maota. O le polokalame o le tuuafaatasia o taiala mo atinae o itumalo, po ua FaaPeretaniaina o le District Development Plans DDP i lona faapuupuua. Ua maea ona faasopolia uma ai itumalo e 49. Ae e toe tasi lava ia le itumalo i Salafai, ia e le i mafai ona tuuafaatasia ia se latou taiala.

O le taimi nei, ua maea lelei, ma ua mea foi ona faalauiloa, ia taiala e 21 e pei ona ou taua muamua e ala i se faauilavea i totonu o lenei Maota, ma ua galulue ai foi ia Komiti a ia itumalo, faatasi ma le fesoasoani a lo tatou Matagaluega, e tali atu ai i manaoga o ia itumalo. E 14 itumalo ua maea ona tuuafaatasia ia taiala, ae e le i faalauiloaina lava aloaia. Aepeitai, ua agavaa lava ia ia taiala, mo le faaogaina i le taimi nei e tusa ma le faamoemoe na tuuafaatasia ai. E 14 foi itumalo, ua maea ona tuuafaatasi ia ata faaitai, po o drafts o a latou taiala, ae o lo o galulue pea Komiti mo le faamaeaina.

E tasi le itumalo e le i amataina le galuega i le tuuafaatasia o le taiala i le taimi nei. O taiala mo atinae o itumalo, o se fuafuaga e ola pea. It is a living document. Ma o le faamoemoe, e iloilo lava taiala i tausaga taitasi, ma silasila foi ia le Komiti a le itumalo, faatasi ma le fesoasoani a le tatou Matagaluega, pe i ai ni vaega e ao ona toe faaopoopo pe sui foi ina ia ausia ia manulauti o atinae e aofia ai ma manuia ai ia tagata uma o le itumalo.

O se tasi o galuega ua toe faamanatu, e o faatasi lava ma le tau tuuafaatasia o taiala mo atinae o itumalo, o le toe faaauuina lea o galuega, i le faamauina o faiga faavae, i iugafono tusitusia a nuu ma afioga. O lea ua FaaPeretania o le Village Bylaws. O le faamoemoe o le a toe faaauu le galuega e tuliloa

ai, ia le faatinoga a afioaga taitasi i le tuufaatasia o a latou faiga faavae po o iugafono, e pei ona aiaia i le Teuteuga o le Fono a Nuu, vaega e 5(a).

O se taumafaiga taua tele lenei, ina ia mautinoa, o lo o aloaia faiga faavae po o iugafono a nuu, e aofia ai ma faasalaga mo so o se soligatulafono, e faatino e tagatanuu, o so o se afioaga. O nisi o nei soligatulafono, e aofia ai sauaga i totonu o aiga. Aemaise ai o sauaga e faasaga i tina ma tamaitai, le fanau ma i latou e i ai aafiaga tumau o le soifua. O se faataitaiga lelei, lea sa faatino e nisi o afioaga e i ai le afioaga o Vaiee i le latou faiga faavae lea sa faalauiloa, o lo o faataoto mai ai i totonu le faasalaga pe tusa ma le \$2,000 mo le tagata e toe sauaina lona toalua, po o lana fanau.

O se galuega ua tataua ona faamalosi, e le pule mamalu a alii ma faipule o afioaga uma ina ia faatino, loa le faamaumuina, o faiga faavae po o iugafono, ina ia maua ai pea le nofo filemu ma le soifua fiafia o tagata uma o le afioaga. O faiga faavae po o iugafono e pei ona aiaia i le Teuteuga o Tulafono o Fono a Nuu, e ao ona lesitala mai i le tatou Matagaluega, o Tina ma Tamaitai, Atinae o Afioaga ma Agafesootai. Ona tuuina atu ai lea o ata o ia Bylaws po o Tulafono, o kopi mo Sui o le Nuu, Resitala o Faamasinoga o Fanua ma Suafa, o le kopi mo le Loia Sili, o le kopi mo le Failatusi o le Fono Aoao Faitulafono, ia ma le kopi foi e tuuina atu i le Matagaluega o Leoleo.

O se galuega e taua tele la lenei, e o faatasi ma taiala mo atinae o itumalo. E momoli atu ai le faafetai i itumalo, ua maea ona tuufaatasia ia a latou taiala, mo atinae. Ma o itumalo la nei ua... e 21 o lea ua maea ona tuufaatasia a latou taiala, ua maea foi ona faalauiloaina. Lefaga ma Faleaseela, Aleipata Itupa i Lalo, Aleipata Itupa i Luga, Vaimauga Nu.1, Vaimauga Nu.2, Aiga i le Tai, Safata Nu.1, Anoamaa Nu.1, Falealili Nu.2, Alataua i Sisifo, Faasaleleaga Nu.4, Faasaleleaga Nu.5, Gagaifomauga Nu.1, Vaisigano Nu.2, Gagaemauga Nu.2, Gagaemauga Nu.3, Gagaifomauga Nu.1, Faleata Nu.3, Vaimauga Nu.3, Vaimauga Nu.4, Faasaleleaga Nu.1, Faasaleleaga Nu.2, Faasaleleaga Nu.3, Salega Nu.1, Gagaemauga Nu.1, Faleata Nu.3, Vaimauga Nu.3, Vaimauga Nu.4. O i latou la na ua maea ona faalauiloa itumalo ma a latou taiala.

O itumalo nei e 14, ua maea ona tuufaatasia a latou taiala ae le i faalauiloaina aloaia: Aana Alofi Nu.2, Aana Alofi Nu.3, Falealili Nu.1, Lepa, Vaa o Fonoti, Faleata Nu.1, Faleata Nu.4, Sagaga Nu.1, Sagaga Nu.4, Siumu, Falelatai ma Samatau, Palauli 1, Satupaitea ma Salega Nu.2.

**Afioga Afoa Amituanai Faleulu Mauli:** Lau Afioga i le Fofoga Fetalai...

**FOFOGA FETALAI:** Malie se i faaauau le saunoaga a le Minisita.

**Afioga Hon TUITAMA TALALELEI TUITAMA:** O itumalo nei ua maea, o lo o faagasolo pea le faatinoina o a latou taiala faapea Komiti o lo o

galulue ai pea Komiti a itumalo faatasi ma le Matagaluega i le faaatoatoaina o a latou taiala. Aana Alofi Nu.1, Aana Alofi Nu.4, Sagaga Nu.2, Sagaga Nu.3, Faleata Nu.2, Faleata Nu.3, Vaimauga Nu.3, Vaimauga Nu.4, Faasaleleaga Nu.1, Faasaleleaga Nu.2, Faasaleleaga Nu.3, Salega Nu.1, Gagaemauga Nu.1 ma Lotofaga.

O le itumalo e toatasi lea o lo o totoe nei i Salafai, o Palauli Nu.3.

Lau Afioga i le Fofoga Fetalai, e faapefea la ona fesoasoani le tatou Matagaluega i le faatinoina o ia taiala? O le faamoemoe o lenei taumafaiga, a maea loa ma faalauiloa aloaia taiala ua finagalo autasi i ai le itumalo ona mafai loa lea ona saili fesoasoani le Komiti galue a le itumalo faapea foi ma le tatou Matagaluega i paaga mo le atinae aua le faatinoina o manaoga ua faataoto atu i totonu o nei taiala. O le taumafaiga lenei sa galulue ai le Matagaluega ma itumalo faapalota uma ina ia tuufaatasia ni taiala o atinae, e talitonu le itumalo o atinae ia e manaomia aua le manuia o tagata uma o lo latou lava itumalo.

O vaega o lo o ave i ai le faamuamua i lenei galuega, o le itu tau pulega ma taitaiga o le soifua maloloina, o aoaoga, atinae o le tamaoiga ma le saogalemu ma le faaitiitia o soligatulafono. O lenei foi taumafaiga o lo o galulue faatasi ai sui o nuu, sui o le Malo, sui tamaitai o nuu faapea foi susuga i faafeagaiga faatasi ai ma le Matagaluega ma ana paaga. E avea ai foi lenei avanoa e faaleoina ai le faafetai tele i a outou Afioga i sui usufono uma ona o la outou lagolago i lenei taumafaiga. E momoli foi le faafetai tele i le galuega fai a sui o nuu, sui o le Malo ma sui tamaitai o nuu e tusa o le lagolago ma le faamaopoopoina o lenei taumafaiga taua a lo tatou Malo. E faapena foi le agaga e fia faafetai atu ai i le paia ma le mamalu o susuga i faafeagaiga o lo o faafaletuluia i totonu o nuu ma itumalo i la latou foi lagolago mai i lenei taumafaiga, a o faasolo atu le galuega i o tatou itumalo. E talitonu le agaga o lo outou naunau ina ia manuia si o tatou atunuu ma soifua fiafia ma saogalemu o tatou tagata, ua mafua ai lo outou galulue faatasi ma lagolago mai i se taumafaiga vaivai a le tatou Matagaluega. Ua amata ona tali atu le tatou Matagaluega ma ana paaga i nisi o manaoga o nisi o itumalo e pei ona tuuina mai i totonu o a latou taiala ua uma ona tuufaatasia ma faalauiloa aloaia.

1. O le faatinoina o polokalame faale-aoaoga ma faalauiloa auala e foia ai faafitauli faa-soifua maloloina, e aafia ai fanau teine, o aafiaga ia pei o faamai foi nei e feaveai i feusuaiga, aemaise foi o maitaga o a tatou fanau teine, faapea foi ma le pule i le ola. O nei taumafaiga o lo o ala atu i se fesoasoani a se tasi o Faalapotopotoga o Malo Afaatasi lea o lo o faipaaga ma le tatou Matagaluega, o le United Nation Funds for Population Activities UNFPA po o lea ua faapuupuu foi o le Population Fund.

2. E tali atu i manaoga mo i latou e i ai aafiaga tumau o le soifua e ala i aoaoga manaomia e le gata mo i latou nei, ae faapea foi o latou aiga ma i latou o lo o feagai ma le tausiga o i latou e i ai aafiaga tumau o le soifua. E



le gata i lea, ae sa mafai foi ona faatau ai nisi o mea faitino e i ai nofoa faataavalevale po o wheel chairs e pei ona faailo atu i totonu o taiala mo atinae. O nei taumafaiga sa faatino i le fesoasoani, i le fesoasoani a le Malo o Ausetalia, e tauala mai i le polokalame mo i latou e i ai aafiaga tumau o le soifua po o lea ua taua o le Samoa Disability Programme, o lea ua toe amatalia i le tausaga faaletupe lenei le laasaga lona lua po o le phase 2 o le polokalame lenei ua toe faaigoaina o le Disability Partnership Programme mo le isi 4 tausaga lea o lo o faagasolo nei.

Sa lagolagoina e le Matagaluega talosaga a nisi o itumalo mo le faatupeina o poloketi o laausuisui ma le gaosiina o elei a tina, o nisi o itumalo ma afioaga ina ia maua foi lenei tomai e saili ai seleni mo le tausiga o fanau ma aiga. Sa mafai foi ona tali atu i manaoga mo ni aoaoga i tulaga tau pulega ma taitaiga, lea sa faatino i nisi o itumalo sa manaomia nei tomai. E le gata i lea ae o atinae o faatoaga a itumalo sa manaomia lea fesoasoani o togalauaina, o lo o fesoasoani foi i nisi o aiga aua le faatauina atu ma maua ai a latou seleni. E le gata i lea, o ia foi taumafaiga sa faatupe mai i le Civil Society Support Programme (CSSP) i le polokalame o lo o faatupeina e le Malo o Ausetalia mo le atinaeina o tina ma tamaitai o Samoa, le Samoa Women Shaping Development Programme. O le a faamaea aloaia le laasaga muamua po o le phase 1 o lenei polokalame i le faaiuga o le tausaga faaletupe o lumanai nei ma le faamoemoe e maea le tapenaga mo le toe amatalia o le laasaga lona 2 o le polokalame mo le atinaeina o tina o Samoa, le Samoa Women Shaping Development Programme mo le isi 4 tausaga, a o le i maea le tausaga nei.

O le polokalame o le CSSP po o le Civil Society Support Programme o lo o faatupeina e paaga o le atinae e aofia ai le Iuni a Europa, (European Union), le Faletupe o le Lalolagi (World Bank), le Malo o Ausetalia le Australian Development Department of Foreign Aid and Trade (DFAT), le polokalame o le Green Climate Fund e tauala mai i le Faalapotopotoga o Malo Afaatasi. E tele avanoa o polokalame o lo o faatupeina i lalo o le CSSP e agavaa ai Komiti galulue o itumalo ma Faalapotopotoga i nuu ma afioaga, e talosaga ai mo fesoasoani e faatino ai atinae ua faataoto i totonu o a latou taiala mo le atinae o latou itumalo.

4. Ua maea ona tuuina atu le talosaga a le tatou Matagaluega i le lala a Faalapotopotoga o Malo Afaatasi i Samoa (United Nation Development Programme-UNDP) mo le lagolagoina o nisi o talosaga sa tuuina mai i totonu o taiala mo atinae o itumalo, e aofia ai le faamamaina o lapisi i lo tatou gataifale, ma o le tasi lea atinae e lagolagoina tele e le tatou Matagaluega ona ua matauina le lafoai o tagapepa iila, lapisi faapena e le pala i lo tatou gataifale ma faaleagaina ai le tatou gataifale ma figota.

5. O lo o talia le faatinoina o aoaoga o suisui mo nisi o itumalo sa talosagaina lea atinae mo tina ma tupulaga talavou lea ua maua mai laausuisui, e ala i le fesoasoani a le Malo o Saina, ae o lo o talia le toe

tatalaina o femalagaaiga ina ia mafai ai ona malaga mai faiaoga mai Saina e faatinoina lea polokalame.

6. Ua mafai foi ona faatino poloketi o aoaoga o laau aina mo nisi o itumalo e ala i fesoasoani a nisi o kamupani tumaoti i totonu lava o si o tatou atunuu. O le faamoemoe autu o taiala o atinae a itumalo, ina ia iloa manino atinae ua finagalo itumalo e faataua ma ave i ai le latou faamuamua, aemaise o atinae e aofia ai ma manuia ai tagata uma o le itumalo. E pei ona faailoa i le taimi o faatalatalanoaga sa faia, o le a galulue le Matagaluega e saili fesoasoani, e le gata i ana paaga mo le atinae ae faapea foi i isi Matagaluega ma Faalapotopotoga a le Malo ma le aufaipisinisi tumaoti i auala e mafai ai ona tali atu i manaoga ma atinae ua faailoa i totonu o taiala mo le atinae o itumalo taitasi. O se tasi lea o matafaii autu a Komiti Galue a itumalo, lea e aofia ai le sui usufono, sui o nuu, sui o le Malo ma sui tamaitai o nuu, ina ia saili foi e i latou ia auala e maua ai nisi fesoasoani e ese mai i lo le taumafaiga a le tatou Matagaluega. O le taimi nei, e i ai itumalo ua tulaga ese a latou taumafaiga i le faatinoina o nisi o manaoga, o lo o faataoto i totonu o a latou taiala. E pei o le itumalo o Lefaga ma Faleaseela ma Alataua i Sisifo i Salafai ma nisi itumalo. O lona uiga e le faalagolago tasi mai i le tatou Matagaluega, mo le faatinoina o manaoga ma atinae ua i totonu o taiala. Ae e iloa ai foi le sui usufono ia o lo o mataala ma le Komiti o lo o galulue, e naunau moni i le atinae o le itumalo, e gaoioi lava latou e saili le tele o nisi fesoasoani. O lo o faaaauu foi galuega a le tatou Matagaluega e ala i le sailia o fesoasoani, e tali atu ai i manaoga o itumalo ua faailoa i totonu o nei taiala. Sa taua ia le pese lea sa faaoga e le tatou Matagaluega e faatino ai le isi vaega o polokalame nei. Ua ala ona ou afea le vaega lea, ona e i ai vaega taua e ao ona silafia e nuu. Faafetai mo le sui usufono sa laga lea tulaga, ua maua ai le avanoa e malamalama ai i le mafuaaga o gaoioiga o lo o aga i ai le Matagaluega. E le faavae i luga o se ea nei mea, e faavae i luga o mafuaaga taua ma le aoga, e ala ai ona faatino galuega nei ia tatou Matagaluega a lo tatou Malo, ina ia lava ma totoa le silafia e tagata uma o le tatou atunuu. O le taumafaiga lenei, o lo o taimua ai le Matagaluega lenei, ae o lo o galulue faatasi ma le Matagaluega o le Soifua Maloloina ma isi ana paaga, e faalauiloa i le atunuu tapenaga e ao ona silafia ma faatino mo puipuiga mai i le faamai o le Koviti-19. E ui e le i oo mai le faamai i Samoa, ae o le naunautaiga o le Matagaluega, ina ia tapenapena o tatou tagata. Pe oo mai le faamai ae ua lava le silafia, malamalama tagata uma i auala e puipui ai, ia o tatou tagata uma mai le aafia i lenei faamai. E le gata i tapenaga faasoifua maloloina, ae o lo o uunaia ai foi le totoina o faatoaga ma laau aina faapea mea fafaga, aua le fofoga taumafa. O le galuega o lo o lagolagosua ai i le galuega tele o lo o feagai foi ma le Matagaluega o Faatoaga ma Faigafaiva. E pei ona molimauina i lenei vaitaimi, talu mai lava le amataga o sa ma vavao sa faia, ua galulue le tele o tagata ma aiga e atinae ia faatoaga. E le gata o talo, fai manioka umala, ae faapea foi i faatoaga o

laau aina eseese. E faafetaia ai le Afioga i le Minisita o Faatoaga ma le Ofisa Sili o Pulega o le Matagaluega, le talia o le talosaga sa tuuina atu mo ni tiapula, manioka, umala faapea fatu laau toto, sa mafai ona tufatufa atu, mo nai aiga e maaleale lo latou tulaga o lo o soifua ai i totonu o le tele o nuu o le tatou atunuu. I le talafatai o Apia nei, faapea foi ma nisi o afioaga i Salafai. O lo o molimoli atu ai foi, i lenei polokalame, le tuualalo i le pule mamalu a alii ma faipule, i afioaga uma o lo tatou atunuu, ina ia silasila totoa i auala e taofia ai, le soona toli faale-alofa o niu, mo le faatau atu. Aemaise ai o le fautuaga mo le toe totoina o nisi niu fou. O lo o faapena foi ona lapatai ai le atunuu, ina ia silasila totoa i le puipuiga ole tatou gataifale mo le soona fagota faasolitulafono o nisi o tagata o fugafuga, o maisu ma loli, mai o tatou gataifale e pei ona faafofoga foi i ai lo tatou atunuu, i se taimi e le o mamao atu. O nei mea uma, o tapenaga uma lava ia, mo mea e tua i ai lo tatou atunuu, i le fofoga taumafai i taimi e feagai ai ma luitau ogaoga, o le soifuaga e pei o faamai tetele faapenei o le Koviti-19. Ina ia oo i le taimi e taunuu mai ai, ua lava sauni ma lava tapena lo tatou atunuu, ma ua silafia auala e mafai ai ona puipua mai latou. Ae o lo o lava foi le taumafa e tua i ai e ala lea i tatou mea toto ma mea fafaga. O lenei foi polokalame, e le gata ina saunoa alii fomai, e toe faamatala vaega uma e uiga i le faamai. Ae faapea foi ona faataitai vaega uma, ina ia tapenapena i ai tagata uma, ina ne i oo mai le faamai, ae ua malamalama ma popoto le atunuu i puipuiga, e ao ona fai. O se tasi la o vaega taua e pei ona tauologologo pea le Matagaluega o le Soifua Maloloina, ma o lo o toe faamamafa foi i taumafaiga o lo o fai nei. O le fufulu mama lea o lima po o outou aao. O fautuaga ua aumai, e tataua ona i totonu o le 20 i le 40 sekone e fufulu ai lima, ona mautinoa lea, ua mama lelei ia ou lima. O le usuina la o le pese lea o le aso fanau, e faatino ai lea fuafuaga, e le i soona faia. E muamua, o le pese lea o le aso fanau, ua lauiloa e tagata uma. Aemaise lava la a tatou fanau, o tamaiti, e usu gofie, e faigofie ona latou usuina, ma fufulu o latou lima. O le usu faa-2 o le pese lea, e i ai foi lona mafuaaga. E le atoa le 40 sekone pe a na o le tasi le usuga. O lea la ua usu faa-lua ai le pese lea, ina ia atoa lelei le 40 sekone, o fufulu pea ou lima. Afai la e i ai se sui po o se tasi foi o le atunuu e le fiafia i le pese lea, e le faatapuina, o le saolotoga lena o le tagata lava ia. Usu se isi au pese e fufulu ai ou lima. Pe fai sau tatalo pe fai sau tauloto. A o le mea taua lea e tau avatu i totonu i i, ia atoa le 40 sekone, o le agaga lea na ala ai ona faaoga le pese lea.

**FOFOGA FETALAI:** Malie le sui usufono se i tulai mai le sui usufono mo Faleata.

**Afioga Faumuina Asi Pauli Wayne Fong (Nuu Tu Taulaga i Sisifo):** Na o se mea e fia malamalama, ae faafetai i le Afioga i le Minisita, e pei o le matou itumalo lea na avatua le pese. Leaga sa fai le polokalame i le matou

nuu ma le matou itumalo. E faafetai atu foi i le Matagaluega, e leai e le faatauagavale i le galuega matagofie ua fai. Ae pau lava le tuualalo sa avatu i le taimi lena, ona o le tulaga i le tele o le vai e alu i totonu o le pese lea. Aua a usu le pese lea e faatosotoso isi, ae vave isi. Ona toe usu faa-2 ia, o fautuaga lava na avatu i lena aso. O lea ua matau atu i lenei aso, la ua fai mai le Afioga i le Minisita e pule lava le tagata ia i lana pese. O lea foi ua maua le tali o le matou tatalo atu, o le a taumafai e usu se pese puupuu e sefe ai le vai. Ma le faaaloalo lava lau Afioga i le Fofoga Fetalai.

**FOFOGA FETALAI:** Malo, e taua foi le pese ae taua foi le vai, ia sefe le vai.

**Afioga Hon TUITAMA TALALELEI TUITAMA:** Ou te le i taua le suafa o le Afioga i le sui usufono, o le manumanuga foi ona o le faatauavaa o le mataupu na aumai. Ae o la ua tuuina mai ma faailoa mai, o le afioga lea na taua le pese. O lea ua silafia, e le sili le manumanu i le suavai, na i lo le manumanu i le ola. E taugata atu le soifua o le tagata na i lo le suavai. Pau lena o se faamatalaga i lenei taimi. E tele tala e fia fai, ae ua lava lea. O nei fautuaga, e mo le saogalemu ma le mautinoa o lo o puipuia o tatou aiga, ma fanau mai le faamai pe afai e oo mai i totonu o tatou laufanua. E le gata i vaega ua taua, ae o lo o faapea foi ona molimoli atu ai fautuaga ma lapataiga e foia ai sauaga mataga ma faafitauli o lo o tulai mai pea i totonu o aiga ma nuu o lo tatou atunuu, i lenei taimi o feagai i tatou ma nei faigata. E le o se tala fai ane foi lenei mea, manatua foi, talu ona tupu mai le faamai lenei, taua mai i lipoti mai fafo, ona o le lockdown ma le taofia o tagata i totonu o aiga. Fai mai ua faatupulaia le pule i le ola, ua faatupulaia sauaga i tina, ua faatupulaia le amio faaletonu o tagata. Ai ona o le loka i totonu o fale, e tele nisi o faamatalaga i lea tulaga. Ae ua maea la ona faasopolia itumalo uma i le polokalame. Ae o le vaiaso nei, ua faamoemoe o le a faasopolia ai ma faamaea ai le galuega lenei o lo o faagasolo e le tatou Matagaluega i le tatou motu tele i Salafai.

Lau Afioga i le Fofoga Fetalai, ona ou oo mai lea i Vai Tumaoti. O lo o faaauau pea ia le faatinoina e le Matagaleuga o Galuega, e agai i le fausiaina o vai tumaoti i nuu ma afioaga e pei ona faamaonia e le Komiti o Tauofoga ma le Kapeneta. O ia galuega, o lo o sosolo lava i luga o fautuaga a le sosaiete o vai tumaoti, e fua foi i talosaga sa tuuina mai i nuu ma afioaga o lo o manaomia ia auaunaga mo le suavai. O galuega mo vai tumaoti, o lo o faatupeina e le Faalapotopotoga o le Iuni a Europa, (European Union) lea o lo o tuusao mai ai ia vaegatupe, sa faamaonia i le Tala o le Tupe a le tatou Matagaluega mo le faatinoina o lea faamoemoe. Ma o lo o faagasolo nei galuega i le taimi lenei lea ua aofia ai le vai o Saaga i Siumu, ua faagasolo le galuega, ia faapea foi le vai i le afioaga i Paia i Salafai. O lea ua maea ona faatino le tauofoga po o le Tender process. Ma o le a sagai atu loa mo le

faamaoniga o tupe e faatino ai lea faamoemoe. O galuega e tetele uma nei, o lo o mulumulitaia taiala ma Faiga Faavae a le Malo, i tauofoga mo lo latou faatinoina. E fautuaina foi le tuuina atu i afioaga, latou te faatinoina nei galuega tetele e pei ona talosaga mai ai nisi o sui usufono o le tatou Maota nei, e tuusao atu seleni ia latou e latou te faatinoina ai galuega ia o vai tumaoti, ona o le naunautaiga lava ina ia mautinoa le saogalemu ma le faatinoina lelei o nei galuega, ina ai malupuipua le suavai taumafa mo le mamalu o le atunuu.

Mo le silafia o le tausaga faaletupe fou leni 2020/2021, o le a faamutaina ai le auaunaga lea sa faatino e le Matagaluega leni mo le atinae o vai tumaoti, ae o le a faaauau pea e le Faalapotopotoga o Vai Tumaoti, po o le Independent Water Scheme Association galuega uma mo leni polokalame e pei ona sau ai. E ui i lea tuutuuga ae e avanoa pea le asosi o vai tumaoti e talosagaina ni fesoasoani mai paaga mo atinae ma atunuu o lo o faipaaga ma le tatou Malo o Samoa i ni fesoasoani latou te ono manaomia e faaauau ai nei atinae i le lumanai.

O lo o i ai vaegatupe e tusa ma le \$1.5 miliona ua faamatuu mai i lalo o le CSSP, le Civil Society Support Programme lea na ou taua muamua e tauala mai i le Faalapotopotoga o le Iuni a Europa (European Union) mo le asosi o vai tumaoti mo le faatinoina o a latou fuafuaga mo le suavai taumafa saogalemu, water safety plans, ma nisi galuega manaomia mo afioaga o lo o faaogaina le auaunaga o vai tumaoti.

O le taimi leni, ua toe 29 afioaga o lo o faia pea i ai i lalo o le polokalame lea o vai tumaoti mai le 34 o nuu sa i ai, tusa la ua 5 afioaga ua faasee ese mai le Water Scheme Association lea a ua faasee atu i lalo o le tatou Pulega o le Suavai, le Samoa Water Authority. O lo o taoto lava i le mamalu o nuu ma afioaga le filifiliga i le auaunaga e finagalo ai i latou mo le auina atu o le latou suavai, pe finagalo e auai i lalo o le polokalame mo vai tumaoti, pe filifili foi e faaoga le auaunaga a le Pulega o le Suavai. Peitai, o se fautuaga mo nuu ma afioaga, ona o le tulaga o le saogalemu o le suavai taumafa e fautuaina ai le agai i le pulega o le suavai mo lea auaunaga, ina ia mautinoa o lo o saogalemu le suavai taumafa mo le mamalu o le atunuu. O lo o faatino lava auala mo le saogalemu o le suavai taumafa o lo o auina atu i vai tumaoti e ala i faamama lea pei ona tufatufaina atu i nuu ia o lo o i ai vai tumaoti ma fautuaina foi ina ia... a i ai se masalosologa i le saogalemu o le suavai, faapuna le suavai, ona taumafa ai lea. O lo o faatino foi siaki masani a le Matagaluega i vai tumaoti nei mo le saogalemu lava o le vai taumafa o lo o faaogaina.

Lau Afioaga i le Fofoga Fetalai, ona ou oo mai ai lea i le auaunaga faalomitusi. O le auaunaga faa-lomitusi, o se tasi lea o auaunaga o lo o faatino e le Matagaluega o Tina ma Tamaitai, Atinae o Afioaga ma Agafesootai. O leni foi auaunaga e avanoa mo so o se tagatanuu, so o se faalapotopotoga, so o se Ekalesia, aoga, aoga tumaoti po o se aoga a le Malo, o Matagaluega

ma Faalapotopotoga a le Malo, o lo o i ai le avanoa e faaaogaina ai lenei auunaga. O le auunaga foi lenei o lo o faatino ai pea le lolomiina o tala o tupe a le tatou Malo, e pei foi ona i ai le tatou Tala o le Tupe o lo o faagasolo nei. O lola palota ma pepa palota, faapea tusi faalupega o lo o tuufaatasia e le tatou Matagaluega. O nisi na o lomiga sili ona taua a le Malo o lo o faatino e le auunaga faa-lomitusi i lalo o lenei Mtagaluega. O ni faamaumauga e taua tele e ao ona malupuipua i taimi e faatino ai le lomiga, privacy.

O se tasi o auunaga e manaomia tele e le mamalu o le tatou atunuu, o le lolomiina lea o suafa i faavaa o Tusi Paia, ia, po o le toe lipeaina foi po o le toe suiina o faavaa o Tusi Paia ma pese lotu ua malepelepe. O le aofai o le aufaigaluega o lo o galulue i le tatou auunaga lea, e toa 26. O masini o lo o faatino ai galuega, o lo o lelei atoatoa, ae se i vagana ai masini fou e lua po o digital printers lea o lo o talosagaina i le Tala o le Tupe o lo o talanoaina nei e faatino ai tapenaga mo pepa palota mo le faiga palota i le tausaga fou lea o lo o tatou alo atu nei i ai. E pei ona silafia, i le faiga palota talu ai, sa na o ata o le au palota i totonu o le lola palota e lanu pe coloured, peitai o le fuafuaga mo le palota i le tausaga fou, o lea o le a i ai ma ata lanu o sui tauva i luga o pepa palota ina ia faigofie mo tagata palota ona silafia i latou o le a fai i ai la latou filifiliga. E fautuaina foi le teuteuina faalelei o lou ata, aua a manaia lava le ata, ia e palota lava le isi ona o le ata. E aoga la lenei foi taumafaiga mo tatou. Ou te talitonu o se auunaga e taua tele, ma e ao lava ona taoto pea i lalo o le faamalumaluga a le Malo le auunaga lenei, e le gata ina malupuipua pea faamatalaga ma lomiga a le Malo, a o le fesoasoani tele foi lea i tagatanuu o si o tatou atunuu i o latou manaoga faa-lomiga ia maua pea le auunaga lenei.

O lenei vaitau, ua tele lava foi ina faatino lava e faalapotopotoga, pisinisi ma kamupani a latou galuega faa-lomiga, ma ua maua masini faapitoa i nei onapo, e malolosi, e talafeagai foi ma galuega tetele o lo o latou manaomia. E ui i nisi o saunoaga sa agiga i totonu o lenei Mota e faapea ua gau le fale, ia ua uma ona ou tali atu i ai muamua, mo le faamaninoina o lea tulaga, ou te faapea atu ai, o le tupe sa fuafua e aoina mai e le tatou Matagaluega i le tausaga faatupe lenei o lo o faagasolo, e \$600,000. Mo le silafia, o le faamaumauga a le Matagaluega i le vaiaso na tea nei, o lo o faamauina ai le aofaiga e tusa ma le \$652,000 le tupe ua ausia. O le ala lea o lou faaalua atu muamua, e le o gau le tatou auunaga faa-lomitusi, o lea e i ai ana tupe faasili mai le tupe na fuafuaina e aoina mo lenei tausaga faaletupe.

Lau Afioga i le Fofoga Fetalai, ona ou oo mai ai lea i le tatou tusi faalupega...

**Tofa Aumua Isaia Lameko (Falealili Sisifo):** Lau Afioga i le Fofoga Fetalai, mo sina avanoa...

**FOFOGA FETALAI:** Ia, se i tulai mai le sui usufono mo Falealili Sisifo. Tulai mai Aumua.

**Tofa Aumua Isaia Lameko:** Faafetai mo le avanoa. Faafetai foi i lau Afioga i le Minisita mo le faamalamalamaina o le mataupu lea sa ou laga, sa ou lauga i le mataupu lea o le tatou fale lomitusi. O lea na ou taua le vaega lea, ona o le taua tele o le lolomiina o faamaumauga. O tatou nuu ma afioaga o lo o fai ai tatou tusi ia tulafono a nuu, lea sa talosagaina ai le Matagaluega, ona e leai se vaegatupe na faaagaaga atu i lalo o sui o nuu ma sui tamaitai e lolomi ai tatou tusi tulafono ia.

O le isi vaega lau Afioga i le Minisita, sa ou taua le tulafono lea o le teuteuga o tulafono o nuu 2017, e oo mai i le aso, e le o mafai ona iloa i luga o le tatou upega tafailagi o i ai se tulafono faapea. E le i mafai foi e nuu i tua ona access mai le information lea ona o lea faatoa amata ona tau faaleleia le tatou fesootaiga...

**Afioga Hon TUITAMA TALALELEI TUITAMA:** Lau Afioga i le Fofoga Fetalai, mo le faasaoina o le taimi, o lea e le i oo atu i ai lau faasologa i le vaega lea ua taua. Ae a pe a onosai mai? Toa mai le sui usufono.

**FOFOGA FETALAI:** Malo. Ia o le mea foi lena o lea sa ou manatu au i ai, ua vave mai le tulai a o lena e le i oo i ai lau saunoaga.

Tulai mai lau Afioga i le Minisita. O lea la ua feleiloga pepa a le toeaina talu ai lou faalavelave.

**Afioga Hon TUITAMA TALALELEI TUITAMA:** Ou te le iloa lava po o le a le mafuaaga o le faauilavea, ae o lena e i ina le pule ma le faimea.

**FOFOGA FETALAI:** Malo. Ou te le toe taliaina se faauilavea seia maea le saunoaga a le toeaina.

**Afioga Hon TUITAMA TALALELEI TUITAMA:** Faafetai. A o lea e faagasolo atu, e le o laaloa lava le vaai i le taua o le mataupu na laga, ma o lea ua taumafai lava e vailiili atu ma faamanino lelei aua le silafia e sui usufono o lenei Maota.

O le tatou tusi faalupega, na o sina talaaga puupuu mo le silafia, na tuufaatasia le tusi faalupega a le Malo, o le masina o Novema 1990 na muai amata ai le galuega ma tofia ai le Komiti o le Faleula i lalo o le Matagaluega o Aoga. O le masina o Me i le 1995 na fetuunai ai galuega a le Komiti ma siitia ai i lalo o le Matagaluega o Mataupu tau Lotoifale. Ona oo mai lea i le tausaga e 2004, na faatoa lomina ai le lomiga muamua o le tusi faalupega a le Malo. O le tausaga e 2005, na toe faatino ai le galuega ona ua manatu e ao ona tuu i ai le faailoga, faailoga foi ia o koma liliu, faamamafa, ina ia sao

lelei le faaleoga o faalupega o nuu, ma ua tonu lea tulaga. E tele nisi na sese ai i le le faaaogaina o faailoga nei ma le atoatoa ai le faaleoina o faalupega o afioaga ma alalafaga i totonu o le tatou tusi faalupega. O lea la na fai ai le galuega lea i le tausaga e 2005. O le tausaga la e 2013 na lomiga ai le lomiga lona lua lea o lo o i ai nei. Ma o le masina o Mati i le tausaga nei, lea na toe tuuina atu ai le faasalalauga e faamanatu atu ai i afioaga ina ia tuuina mai maliega ma nisi o faamaumauga e mai i faamasinoga pe afai ua i ai mo le faasaoina o faalupega mo le lomiga lea ua fuafuaina e faataunuu nei i le tausaga nei, a o le i maea le tausaga nei. Ma o lea la, talu ai ona o le faamai ma le tulaga foi o le tatou SOE, ua manatu ai le Matagaluega, e toe tuu atu se taimi, se i feiloai faalelei ai afioaga, faatalanoa lenei mataupu, ma faia ai loa ni a latou faaiuga tumau ma tamau, ia ma saina loa ma momoli mai i lo tatou Matagaluega, ia aua le tatou Tusi Faalupega lea, ma ua tuuina atu ai le faaiuga o Aokuso, o le faaiuga o Aokuso o le a faamuta ai loa, ia le tulaga lea o le taliaina o ni suiga, pe afai e i ai ni suiga manaomia e finagalo i ai afioaga ma alalafaga, ia ona tuuina mai lea ae e le i oo i le faaiuga o Aokuso. A maea loa Aokuso... ae afai foi ua atoatoa lelei faalupega o lo o ia ia i le Tusi Faalupega o lo o i ai nei, ia e manaia lava pe a aumai pea le faaaliga mai le afioaga eseese, e faailoa mai i le Matagaluega, o lo o atoatoa ma lelei faalupega o lo o i ai i le Tusi o lo o i ai nei mo le isi lomiga pe a oo ina faatino ma faataunuu.

Ia lau Afioga i le Fofoga Fetalai, ona ou oo mai loa lea i le mataupu lea sa tulai mai ai le sui usufono o Falealili, i le tatou website lea sa taua. Ia po o le upega tafailagi. Ia mo le silafia o lenei Maota faapea sui usufono na laga lenei mataupu, o lea ua maea ona toe faalelei le auaunaga i le tatou upega tafailagi ia po o le website a lo tatou Matagaluega, ia ma ua tuuina uma i luga Tulafono ma Taiala o lo o limataitaiina ai le tatou Matagaluega, ma lana auaunaga.

Ae o se fesoasoani mo le sui usufono, po o ni sui usufono foi o lenei Maota ma le atunuu foi o lo o faafofoga mai, pe afai e i ai se Tulafono o lo o manaomia vave, ae e le o maua i luga o le tatou upega tafailagi. E mafai ona maua ata po o lomiga hard copies mai i le tatou Matagaluega ia faapea foi i le Ofisa nei le Ofisa o le Fono.

O nisi la nei o Tulafono, ia ma o lo o i ai ma lona Faa-Peretania, ua mafai ona tuuina atu i luga o le tatou webpage lea o Upega Tafailagi a le Matagaluega e pei ona fesiligia e le sui usufono.

1. Tulafono o le Matagaluega o Mataupu Tau Tina ma Tamaitai 1990. Ministry of Women Act Affairs Act 1990.
2. Teuteuga o le Tulafono a le Matagaluega o Mataupu Tau Tina ma Tamaitai 2009. Ministry of Women's Affairs Amendment Act 2009.
3. Tulafono o Fono a Nuu 1990. Village Fono Act 1990.
4. Teuteuga o Tulafono o Fono a Nuu 2017.
5. Tulafono o Mataupu Tau Lotoifale 1995. Internal Affairs Act 1995.



6. Teuteuga o Mataupu Tau Lotoifale 2010. Internal Affairs Amendment Act 2010.
7. Tulafono mo le Puipuiga o Aiga 2013. Family Safety Act 2013.
8. Tulafono mo Fanau 1961. Infant Ordinance Act 1961.
9. Tulafono Faatonutonu o Mea Samoa Faa-anamua Ietoga Samoa 2013.

Ia o Tulafono ia o lea o lo o faatonutonu ala i le faatinoga o galuega a le tatou Matagaluega. Atonu o le a fesoasoani lea i nisi o fia silafia ia lea tulaga. Ia ona ou oo mai lea lau Afioga i le Fofoga Fetalai i Sui Tamaitai o Nuu e pei foi ona laga mai. O sina brief...

**FOFOGA FETALAI:** Ua ou manatu e faauilavea i le saunoaga a lau Afioga i le Minisita o Tina ma Tamaitai, ona e i ai le talitonuga a le Nofoa e lelei ona amata i le vaega lea pe a tatou toe taliu mai i le 3:00pm. Ae mo le taimi nei, ua manaia lava le vaega lea ua motu ese, e vavae ai foe o le tatou galuega. Ia ma e ona o lea ua tatou taunuu, i le itula foi e vavae ai ia galuega o lenei aoauli, ia ma lenei aso, ou te faasilasila atu ua faataatiaese galuega a le Fono Aoaofaitulafono i le taimi nei, seia le 3:00 i le aoauli nei. Ia ma lou faaloalo.

*Na faataatiaese Taulumaga a le Fono Aoaofaitulafono i le itula e 1:00 i le aoauli seia aulia le itula e 3:00 i le afiafi.*